

1642.  
1600.  
1679.







9

# Von dem Beruff der Prediger.

Vnd wie fern weltliche Oberkeit macht  
hat / dieselbigen ires Ampts zuentsetzen /  
Nötiger Christlicher bericht aus  
Gottes Wort/

Joachimus Gör-  
lin D. sampt zweien Brieffen  
D. Doctoris Martini  
Lutheri. *von M. Leib. H. H. H. H.*  
*1574. 27. R.*

Jesa: 66.

Sihe der HERR wird kommen mit Feuer /  
vnd seine Wagen wie ein Wetter / das er vergelte im  
grim seines zorns / vnd sein schelten in Feuerflam-  
men/etc.

Anno M. D. LXV.



6

Das Buch ist dem Herrn  
von dem Herrn

der Herr

Das Buch ist dem Herrn  
von dem Herrn

der Herr

der Herr

Das Buch ist dem Herrn  
von dem Herrn

der Herr

der Herr

der Herr

der Herr

Das Buch ist dem Herrn  
von dem Herrn  
der Herr

Das Buch ist dem Herrn  
von dem Herrn



# Dem Wirdigen vnd

Wolgelerten Herrn Magistro Fran-  
cisco Marxhausen / Pfarhern zu S.

Michael / der löblichen Stad  
Hildesheim.

**W**

Sttes Gnad in Christo Je-  
su vnserm lieben Heiland. Wie-  
ber Herr Magister / Es mag  
mirs die liebe Welt auslegen  
vnd verkeren wie sie wil / so weis  
der Ehrwürdige vnd wolgelarte / Magister  
Bartholomeus Wolffhart / mein freundlicher  
lieber Beuatter ewer Superintendens / vnd  
ir so wol als andere viel fromer Diener Chris-  
ti gar wol / wie viel jar ir vnd dieselbigen mir  
heftig angelegen seid / das ich doch von dem be-  
ruff der Prediger / wolte einen gründlichen be-  
richt lassen ausgehen / ich aber mir immer für  
der kost lassen grawen / Erstlich / das die arbei-  
viel einen gelehrten Man haben wil / vnd zum  
andern / das ich wol weis / wohin es die schen-  
liche verdampfte Welt / ihrer giftigen vnart  
nach deutet vnd verstehet / wenn wir von vnser-

Al z

rem



### Vorrede.

rem beruff aus Gottes wort berichtet thun / der  
sol kurzumb verachtet vnd nichts sein / zei-  
gen wir aber an **GOTTES** wort / worfür  
derselbige in wolle gehalten haben / so müssen  
wir hören / das damit nichts gesucht werde /  
denn wie sie die Welt selbst in allen iren wer-  
cken sucht / ir schendliche stinckende ehr vnd ei-  
genen namen / welches doch Gott von Himmel  
weis das wirs nicht thun / Sondern weil Gott  
seine ehr in dem Almyt suchet / vnd gar getrew-  
lich richten wird / wie Christus saget / Ioan. 8.  
Wolten wir gern vnd wünschlen von hertzen /  
das beide die Prediger solche seine ehre nicht  
mit schendlicher verseumunge ihres hohen  
Almyts / vnd denn die Zuhörer mit der schendli-  
chen verachtung verkleinerten.

Wiewol aber nun mehr der Welt darinn  
nen nicht zu helfen / sonderlich jezund / da sie  
zu gar verderbet ist / vnd Gottes zorn mit aller  
gewalt daher brennet / von wegen vnser vn-  
ckes / So hab ich doch zu letzt / euch vnd fromen  
hertzen meine dienst erzeigen / vnd weil die ver-  
achtung von tag zu tag grösser wird / auch mei-  
ne Seele retten wollen auff den tag des künff-  
tigen schrecklichen Berichts / dienet es jemand  
darneben zu seiner besserung / ist meine freud  
desten



### Vorrede.

desten grösser/ Ich darff meinen fromen Gott zeugen / das ich hierinnen niemands zu lieb noch zu leid gethan/vnd für meine Person lauter nichts gesucht denn Gottes ehre/vnd die liebe warheit den Gotteseligen zu dienst/mag dert halben frölich rhümen mit Jeremia / Cap. 17. Ich bin von dir nicht gewichen mein Hirte/so hab ich Menschen tages nie begeret/das weistu was ich aber gepredigt hab/das ist recht für dir.

Darumb richte die Welt getrost darvon was sie wil/so bin ichs gar hertzlich wol zu Frieden/Es heist/ *Qui sordet, sordescat ad huc*, wer kan im helfen? Vnd mus ja Gottes wunder Rath an vns/wie an Christo vnserm Erzbischoff oder Erzhirten erfüllet werden/wie derselbige vielen zum fall gesezt / das wir auch etlichen *odor mortis ad mortem* seien/ ob vns wol das zu geringer freude reicht / wie Gott weis vnd die erfahrung gibet / müssen aber seinen willen lassen walten.

Ich kan aber wol erachten/was jr vnd andere in dieser meiner arbeit wünschen werden/Nemlich das es möchte alles weiter verfleret sein/Denn es fast nicht viel mehr denn ein kurtzer auszug ist derer sachen/so da noch alben solten weitleufftiger tracteret werden / Aber



Vorrede.

ir wiſſt lieber Herr Magiſter meine ſchwacheit  
des Leibes / von wegen meines Zabuli oder  
Calculi / vnd das ich faſt verdrossen werd / Wö-  
gen derhalben frome Herzen verlieb nemen /  
vnd ſelbſt dieſe Materias beſſer verkleren denn  
ich gethan / oder thun können.

Soch ſtehet es bey dem fromen Gott / ob  
mich der nötigen würde durch andere Leute /  
one zweiffel ſo wird er als denn auch luſt vnd  
willen geben / das ſein veterlicher wille geſche-  
he / darzu ich im / nach dem vermögen / das er  
mir wird darreichen als mein fromer trewer  
Gott / gedencck zu dienen / zu leben vnd zu ſter-  
ben / Derſelbige erhalt vns ja bey im / in reiner  
Reue / bis auff den tag Iheſu Chriſti / Amen.  
Aus Braunschweig den 23. Martii / im 1565.  
Jahr.

Joachimus Wörlin D.  
ewer Freund / das wiſt  
ir etc.

Vorrede



# Vorrede.

**S**hat der liebe frome Gott sonderlichen vns armen Deutschen / mit reicher gnade vnd barmhertzigkeit angesehen / vnd nach dem wir erbermlich / sampt aller welt / vnter der grausamen finsternis vnd Tyranny des leidigen Papsthumbs / lange zeit jemerlichen vbel geplagt worden / hat er das herrlich schöne liecht seines Worts / mit grosser krafft / reichlich vnd vberschwenclich scheinen lassen / Dadurch wir beides gestudiret vnd gelernet haben / das wir wissen den seligen heilsamen trost / vnser betrubten armen gewissens / Wo wir den suchen / wie wir den erlangen / vnd endlich darinnen mögen bey Gott ewig selig sein / vnd denn / was die Stende sind / vnd wie ein jeder in seinem Stande Gottselighen leben / vnd dem lieben Gotte angenehme dienst erzeigen köndte.

Aus welchem allen / des Papsts lesterliche Abgötterey / schendlicher mord der armen Seelen / die er verreterlichen verführet / vnd denn auch diese schelmeirey klar vnd offenbar worden ist / da er seiner vermeinten Geistlichen Stand / weit vber alle welt erhaben / vnd dargegen den Weltlichen stand vnd Hausregiment / jemerlichen verdruckt vnd verkleinert / das kein Fürste / kein Hausuater haben können wissen / wie jr Stand Gott angemem vnd gesegnet were / sondern haben mit zaghaftigem gemüt darinnen gelebt / vnd



## Vorrede.

da sie sich zu Gott solten einiges gutes versehen / haben sie der Gottlosen Buben freundschaft / fürbit vnd gemeinschaft irer von Gott verdampften heiligkeit / mit vnzelichem grossen Gelt / vielen stiftungen vnd yerlichen Renten / schwerlich müssen erkauffen vnd zu wegen bringen / darauff sie dennoch mehr trosts nicht bekommen / denn das sie im Fegfeuer dort eine zeitlang nicht müsten brennen vnd büssen / Wie lang aber? Das möchten sie ebentwren vnd erfahren.

Ist also Leib vnd Seel / Gelt vnd Gut in des Papssts henden gestanden / vnd alles / wo Gott nicht sonderlichen vnd wunderlichen gerathen / wie ohne zweiffel iren vielen am letzten ende geschehen / durch in auffgegangen.

Vnd hat solche Tyranny vnd schinderey niemand dürffen anfechten / sondern haben sich dafür entsetzt alle grosmechtige Keyser vnd Potentaten / ja alle welt dieselbigen für eitel heiligkeit vnd herrlichen Gottesdienst gehalten / vnd halten müssen / Bis so lange der liebe Gott sein liebes Wort gegeben / dadurch er die gewissen aus diesen Ketten vnd banden gerissen vnd gefreiet / die Stende widerumb herfür gerückt vnd erhaben / vnd des Papssts bübereye entdecket vnd an das liecht gebracht / des alles man dennoch so liederlich nicht sollte vergessen / sondern solche gnedige hohe wolthat Gottes / vnd Väterliche rettung / so mit keinem Gut der Welt zubezalen / billich zu gemüt vnd hertzen führen / das wir mit ewiger dancksagung in solten loben / vnd nu daraus frommer werden.

Aber



## Vorrede.

2.

Aber/aber/wie wir dem lieben fromen Gott in allerley Stenden / für so vberschwencliche reiche wolthat gedanckt / das ist leider für augen / vnd ist one zweiffel kein fromes hertz / das es one weheklagen/bedencken vnd betrachten köndte. Die Summa ist kurtzlich/das vnter dem schein des heiligen Euan-gelij/ein jeder gethan was in nur gelüftet / nach Gotte vnd seinem wort niemands gefragt / Sondern der größte theil in sünd/in schand / in bosheit vnd vbermut gewaltig gewachsen vnd zugenommen / haben mit solchem schendlichen leben / den Widersachern gröblich vrsach geben/den vnschuldigen heiligen namen Gottes / vnd sein Wort zu schenden vnd zu lestern/Das ist ein stück vnser danckbarkeit.

Vnd wenn wirs denn auff's eusserste/gar vnleidlich/bös vnd vbel gemacht / haben wir auch nicht köndten leiden vnd gestatten / das Gott in seinen armen Dienern / mit vns darumb hart vnd vnfreundlich solte reden / sondern haben gestricks dahin gedrungen/das vns Gott bezeihen / vnd vnser wil-lens alles solte machen lassen / sich seiner Göttlichen gewalt vnd rechtens begeben vnd verzeihen / das er vns seine armen Creatur / Erdenkloes / Madensecke vnd Dellebrende/nimmermehr darumb solte zu rede setzen noch sawer ansehen / wo nicht: so haben seine arme Diener müssen das bad ausgiessen / vnd springen/Das ist das ander Deo gratias.

Aus welchem gefolget ist Gottes betraweter zorn / Dse. ix. ij. Thessa. ij. Das er vmb solcher des Volcks Sünde willen / vnter die fürnembsten trefflichsten

B

lichsten



### Vorrede.

lichsten Lerer einen Schwindelgeist gegeben / das sie  
angefangen zu kollerren vnd zu schwermen / vnd also  
eine Secte der anderen mit hauffen gefolget / die da  
Gottes Wort widerümb verkeret / die reinen Lere ver-  
felschet / vnd es in irem Ampt gehandelt / vmb zeitli-  
cher ehr / fried / nutzses vnd gunst willen / wie es einem  
jedern gelegen gewesen / das ist vnser dritter lohn /  
den wir dem lieben Gott zu danck gegeben haben.

Es hat aber noch der langmütige frome Gott /  
gleichwol etliche rechtschaffene trewe Diener gelas-  
sen / vmb seiner Aufferwelten willen / die mit frölicher  
frischer stimme / beide der Welt vnd irrenden Predi-  
gern oder Lerern vnter augen gegangen / sie beide irer  
Sünde vnd Irrthumb / beneben Gottes zorns erin-  
nert / mit gelinden vnd harten / guten vnd bösen wor-  
ten / wie ihnen Gott des befehl vnd gewalt gegeben /  
j. Corin. iij. vnd ij. Cor. xij. nicht allein heimlich / Son-  
dern auch / wo der Irrthumb öffentlich ist worden /  
öffentlich für aller Welt / auff das sie die irrenden  
möchten widerümb mit Gottes gnade zu rechte für  
bringen / oder doch zum wenigsten ihre Zuhörer / glei-  
chem vnfall retten / Da aber ja Gottes Gerichte zu  
hart / vnd der keines zuerheben were / das sie doch da  
mit ire schuldige trewe erzeigen / vnd ihr selbst eigene  
Seel möchten retten / auff dem tage des schreckli-  
chen Gerichts Gottes / Daranff aber gefolget die  
vierde schreckliche grausome Sünde / das man auch  
solch widerfechten falscher irriger Lere / so der frome  
GOTT / Sonderlich hart / den rechtschaffenen  
seinen Dienern eingebunden vnd befohlen / mit  
nicht.



nichte hat wollen dulden noch leiden / sondern ungeachtet / was Gott gefelt oder nicht / hat man in offentlichen Mandaten / demselbigen zu wider / ernstlich verbotten / den Schwermern ferner einzureden / damit vielleicht die Lere an keinem ort reine bliebe / alle Welt zum Teufel füre / vnd ja niemands selig würde. Als aber die fromen / trewen Diener **CHRIST** / dem nicht künden Passiren / ist nun auff das eusserste kommen / das man sie aus ihrem / ihnen von Gott befohlenem Ampt / nicht alleine vnerkantes rechten / mit Weib vnd Kinder ins elende jagt / Sondern man suchet auch / wie man sie aller Welt verhessig mache / schneidet inen / so viel möglich / ehr vnd glimpff ab etc.

Dis sind die starcken gewaltigen Deubtsünde / die vber Deutsche Nation ruffen / darinnen vnser armes Vaterland / gleich als mit einer Sündflut beschwemmet ist / vnd also eingenommen / das hie kein rath noch trost mehr ist / dieser ursach / denn solche Missethat helt die Welt für keine Sünde mehr / Sonderlichen aber helt sie das für keine mishandlung / das sie die Diener **CHRIST** verstößt / verjagt / aus dem Ampt setzet etc. vnd dürffen die Juristen (sage nicht von allen) zu Herrn hoff / die sachen noch fein schmücken / als für gar recht vnd wolgethan / das sie den armen Herrschafften damit ein hertz einpredigen / Ein Obrigkeit (sagen sie) hat ja macht / Prediger zu beruffen / darumb hat sie auch macht Prediger abzusetzen / Dat also für Gott nichts auff sich / wenn ein Prediger nicht wil / wie es im seine



### Vorrede.

Weltliche Herrschafft für gibt / das dieselbige Herrschafft einem solchen Esel / Bachanten / Stürmer / Auffrührer / Münsterischen harten Kopff / Seichtgelerten etc. zum Teufel von der Cantzel stößt / denn solcher wörter vnd dergleichen / schwemmen Dertz vnd mund dieser leute vol / gehen damit vber. Nñ wenn denn die arme Kirche also ires trewen fromen Seelhirten / als einer sonderlichen hohen gaben Gottes / Ephe. iij. beraubet wird. Trotz das vnter den armen Scheslin Christi / jemand das selbige beseufftze vnd beklage / da sol alle Welt lachen / solch fürnemen im lassen gefallen vnd für recht halten / Wer das nicht thut / vnd sein Conscientz wil damit nicht für Gott auch behengen / der hats am halse vnd ist schuldig / wie Lutherus seliger sagt / *Liminis cresæ maiestatis.*

Wenn nu Gott das kōndte oder wolte lange leiden / müste ich mir seinen willen auch gefallen lassen / Ich hab aber leider sorge die Rute sey gebunden / das mit vns Gott greulich grausam haben wird / wolte Gott / zu vnserer besserung / des ich aber darumb wenig hoffen kan / weil keiner Seligkeit zu hoffen / wo keine erkentnis ist begangener Sünde / vnd kein auffhören / wie Gott spricht Jere. v. vnd viij. Wie sol ich gnedig sein / weil sie bleiben verstockt in irem vngesorsam / vnd ist keiner dem seine bosheit leid were / vnd spreche / Was mache ich doch? Ja eben darüber feret man fort / verfolgt die armen Diener Christi / verjagt / vertreibet / schendet vnd lestert sie.

Weil denn das ist in der heiligen Schrifft vnd Gottes vrteil / *immedicabile vulnus*, wie der heilige Geist:



Vorrede.

4.

Geist spricht ij. Para. xxxvj. Der Herr sendte zu jnen durch seine Boten bey zeit genug / denn er schonete seines Volcks / vnd seiner wohnung / aber sie spotteten der boten Gottes / vnd verachten sein Wort / vnd effekten seine Propheten / bis der Grimme des Herrn vber sein Volck wuchs / das kein heilen mehr da war / Vnd denn daraus kein zweiffel ist / wie Paulus saget Roma. xj. Da Gott der Juden / als der Natürlichen Zweige nicht verschonet / das er vnser / als der wilden Reiser / in gleicher Sünde viel weniger schonen wird / Ob denn damit der letzte zorn Gottes würde vber vns erbrennen vnd angehen / das wir sein wort wider verlieren / vnd in grosse plage vnd jammer geraten solten / wie geschehen wird. So wil ich hiemit mein gewissen gerettet / vnd für aller Welt haben frey gemacht / das ich solch fürnemen nicht gebillichet / dar zu auch von Ampts wegen nicht geschwiegen / sondern jedermenniglichem / am allermeisten die Herrschafften vnd Obrigkeit / hiermit aus Gottes Wort / eines besseren berichtet / vnd trewlich mit aller Demut wil gewarnet habē / Wem zu raten ist / dem helff hierdurch der liebe frome Gott / wer nicht wil jme raten lassen / der fare hin / vnd gebe mir nur zeugnis an jenem tage / an welchem Gott richten wird den vmbkreis der Erden / durch einen Man / dem ers befohlen / Acto. xvij. Das ich trewlich gewarnet / vnd so viel gethan habe als mir befohlen ist. Ezech. iij. etc.

Dieweil aber dis vnglück fürnemlich daher kömpt / das wenig wissen noch betrachten / was der Prediger Beruff / vnd zwar auch eben vnter den Pre-

B iij

digern



## Vom Beruff der Prediger.

digern selbst/ein gros theil das nicht bedencet / dar  
ümb auch Haushalten / das es Gott im Himmel  
erbarme/so wil ich alhie kurtzlich vnd gründlich aus  
Gottes Wort/vom Beruff bericht thun / vnd für  
nemlich diese folgende stück handelen / Als nemlich.

1. Wer das Predigamt eingesetzt.
2. Was dasselbe sey.
3. Wie one Beruff niemand zu hören.
4. Was ordentlicher beruff / vnd wie mancher  
ley der sey.
5. Ob jemand möge seine dienst anbieten/vnd  
welcher weise das geschehen könd.
6. Wer Prediger zu beruffen habe.
7. Welche sollen beruffen werden.
8. Worauff ein Prediger beruffen.
9. Worinne Sumarie der dienst vnd sein ampt.
10. Wie/vnd worümb ein Pfarherr / widerümb  
zuentsetzen/ was der Proceß sey.

**I**n diesen stücken haben wir  
Gottes Wort/ist darümb kein Adiapho  
rum / vnd wil örlicher handel/ das wir  
dauon möchten halten/hierinnen thun/  
handeln vnd machen vnsers gefallens /  
one schaden vnd gefahr der ewigen selig  
keit/ sondern müssen dieser Richtschnur ernstlich fol  
gen/ oder den Gott nicht achten / der solch wort vns  
mit ernst zu halten aufferleget vnd befohlen hat/ das  
merck. Wer



## Wer das Predigamt hab eingesetzt.

**N**ach dem/dem lieben Gotte sein Werck / das er den Menschen geschaffen / so bößlich vbel gerathen / das derselbe von jm abgefallen / vnd sich an den leidigen Teufel / als einem abgesetzten ewigen feind Gottes / gehenget vnd begeben hatte / Vnd aber aus hertzlicher liebe / Gott den armen verfürten / vnd verlornen Menschen widerumb retten wolte / hat er anfenglich Persönlich mit jm dauon geredet / den grewlichen fall vnd jammer für augen gehalten / in welchen er sich selber gefüret / dargegen aber seinen heimlichen vnd ewigen Rath eröffnet / wie vnd welcher gestalt er dem armen verdampften Menschen / widerumb helfen wolte / Gen. iij. Ist also zwischen Gott vnd dem Menschen / von anfang / das ein nige Mittel gewesen / dadurch aller handel fürgenommen / Was zu des Menschen Seligkeit gehöret / Gottes wort / welchs er in dem Paradis / eigener Person / wie gesagt / on alles Mittel dem Adam fürgetragen / vnd jm damit den frölichen trost gemacht / des wir vnd alle Welt / so viel derselbigen dem wort glauben werden / in ewige ewigkeit mit höchster vnansprechlicher freude / an Leib vnd Seel geniessen sollen.

Was auch nachmals der frome Gott / dem armen Menschen zu helfen / auff solchen trost fürgenommen / ist immer durch das wort geschehen / allein das sich Gott nach der zeit verhüllet / nicht mehr also ohne mittel mit dem Menschen geredet / sondern hat darzu



### Vom Beruf der Prediger.

darzu ein Ampt verordnet / in welchem er solch sein wort fürgetragen / vnd an die Menschen zu jederzeit gelangen lassen / also hat er mit Mose geredet / vnd im das Gesetz gegeben / durch das Geschefte der lieben heiligen Engel / sagt Stephanus Acto. vij. vnd Paulus Gal. iij. Wie er auch zuuor mit den Vetern / vnd hernach mit den Propheten durch Engel geredet. Gene. xvij. Daniel. ix. etc. Widerumb aber durch die Vetter vnd Propheten / solch sein wort ferner lassen an die gantzen Kirchen vnd Gemeine bringen / vnd sie desselbigen berichten.

Vnd hat der liebe frome Gott solche offenbarung seines Worts vnd willens / dermassen zu jederzeit bey etlichen Personen / in dem ampt erhalten / wie er sonderlichen vnter seinem Volck / den Stammen Levi darzu verordnet hatte / Allein wo dieselbigen faul vnd seumig worden / so erwecket er auch wol außser diesem Stammen Propheten / durch die er das Volck berichten lies / sonderlichen wenn etwas großes vorhanden war. Denn diese Regel hat Gott zu jederzeit gehalten / sagt Amos Cap. iij. Das er nichts gethan / er habe denn zuuor sein geheimnis / was er zuthun bey sich bedacht gewesen / den Propheten / seinen Knechten oder Dienern offenbaret / das sie dar auff das Volck berichten / vnd für künfftigen schaden trewlich warnen solten / das heist weissagen oder predigen.

Als aber die zeit der Juden fast herümmer gewesen / vnd Gott den rechten Ertzhirten selbst / nach seiner verheischung / Ezech. xxxiiij. schicken wolten /



Vom Beruff der Prediger. 6.

len / vnd damit sein wort in alle Welt lassen ausgehen / hat er zuuor solches den lieben Joannem lassen verkündigen / welchem auch Christus als bald gefolget / solch Ampt zu predigen / darzu er auff Erden kommen war. Isai. lxxj. vnd Marci j. persönlich ausgerichtet / vnd dasselbige mit seinem tewerbaren Blute / leiden vnd sterben geheiligt / wie er spricht Lu. xxiiij. Also musste Christus leiden vnd auferstehen von den Todten am dritten tage / vnd predigen lassen etc. Dat es auch mit vielen herrlichen Mirakeln / vnd sichtbarer gegenwertigkeit des heiligen Geistes / in den Aposteln bekräftiget / welche es fortan widerumb / anderen getrewen Leuten / durch sich vnd ire Jünger befohlen haben / i. Timo. iij. vnd ij. Timo. ij. Damit es also bis auff diese zeit / in der heiligen Christlichen Kirchen erhalten / vnd hinförder sol vnd mus erhalten werden / bis zum Jüngsten tage.

Ist demnach der rechte Stifter des Predigampts / der frome Gott / der es aber nicht allein eingesetzt / sondern ist auch zu jederzeit warhafftig in dem Ampt gegenwertig gewesen / hat selbst geredet durch die Veter vnd Propheten. Jere. vij. Luc. j. vnd Ebre. j. Redet / vnd prediget auch noch itzund / wo das Ampt recht wird ausgerichtet / vnd treget das wort seiner Kirchen für / zu irer Seligkeit / Wie Paulus spricht / ij. Corin. v. Wir sind Legaten oder Botschafften an Christi stat / denn Gott vermanet durch vns / ist durch das Wort vnd predigt krefftig / Wie Paulus auch saget / Col. j. Ich arbeit daran / nach der Wirkung des / der in mir krefftiglich wircket / das wir  
C cket/



tuch

## Vom Beruff der Prediger.

darstellen vollkommen etc. vnd zu den Gal. ij. der mit Petro ist kresschtig gewesen vnter die Juden / der ist mit mir auch kresschtig gewesen vnter die Weiden. Vnd zu Iherusalem erzelet Paulus Jacobo vnd den Eltisten / was Gott gethan hatte vnter den Weiden / durch sein Ampt. Act. xxj. In Summa / Gott wircket durch das Ampt Glauben im hertzen vnd ewige Seligkeit / denn Diener sind wir / spricht Paulus / j. Cor. iij. vnd Gottes gehülffen / durch welche jr seid glenbig worden / vnd Rom. x. Der Glaube kömet aus der Predigt / das predigen durch das wort Gottes / Daher Paulus das Euangelium heist / eine krafft Gottes / die da selig machet alle die daran glauben. Rom. j.

One zweiffel / wer denn seiner seligkeit nicht vergisset / das teure Blut Christi nicht verachtet / Gottes ordnung aber vnd werck fur augen hat / der wird das Predigampt gar schön / lieb vnd wert achten / Wer es aber verachtet / der verachtet freilich keinen Menschen / wie Paulus sagt / j. Thessa. iij. Sondern seinen lieben Erlöser / vnd fromen Gott / Luc. x. Den wil ich widerumb veracht machen / vnd verwerffen ewiglich / spricht Gott / i. Samuel. ij. Vnd im ersten Buch der Cronica / cap. xxix.

## Was ist denn das Predigampt?

**S**olches ist aus dem / was itzund gesaget / leichtlich / gründlich vnd wol abzunemen / Nemblich / das es ist vnsers **HEILIGEN** Gottes Regiment / in dem verordneten dienst der kirchen /  
darin



Vom Beruff der Prediger. 7.

darinnen er etlichen Personen / so er darzu beruffen /  
den gemeinen schatz / aller von Christo erworbenen  
Güter / den Leuten fürzutragen befohlen / in der münd  
lichen Predigt Gottes Worts / vnd austeilung der  
hochwürdigen Sacrament / nach der einsetzung  
Christi / Vnd darauff den gewalt der Schlüssel ge  
geben hat / zu lösen die jenigen / so dem wort glauben /  
Widerumb aber zu binden die Halstarrigen / so ohne  
busse vnd Glauben / in sünden oder heucheley / wider  
die predigt Gottes worts verharren.

Das aber das Predigamt Gottes Regiment  
sey / darinnen er gegenwertig selbest seine kirchen regie  
ret / mit derselbigen redet / ist mit klarem zeugnis kurtz  
zuuor gnugsam bewiesen / vnd wird daher / das gepre  
digte wort vnd Euangelium / Gottes Reich geneuet /  
Luc: am neunnden. Da die Jünger werden ausgesand  
zu predigen das Reich Gottes / Vnd sie giengen hin  
naus / spricht Lucas / durchzogen die Merckte / vnd  
predigten das Euangelium / Vnd Paul: Col. iij. rüh  
met etliche / die im trewlich geholffen das Ampt trei  
ben / vnd spricht / Diese sind alleine meine gehülffen  
am Reich Gottes / Hat im auch der liebe Gott solch  
Regiment / sonderlichen aus bescheiden vnd fürbehal  
ten / das er das selbst wil zuerrichten haben / Wie  
David spricht im hundert vnd funffzehenden Psalm.  
Der Himmel ist des **HERREN** / aber die Erde hat  
er den Menschen Kindern geben . Vnd Syrach cap.  
xvij. In allen Landen hat er Herrschafften veror  
denet / Aber vber **ISRAEL** ist er selbst **HERRE**.



### Vom Beruff der Prediger.

Sol derhalben solche Regierung / von aller Weltlichen Herrschafft / weit vnterscheiden sein / der Keyser vnd andere Obrigkeit / ire sachen / in irem von Gott befohlenem Regiment / trewlich ausrichten / vnd wol bestellen / wie sie vberaus genug zu thun haben / wenn sie es zimlicher mas wollen recht ausrichten / darneben aber / sollen sie dem lieben Gott / diese seine Regierung auch gönnen / in darinnen zu frieden lassen / oder er wil sie zu scherben machen / Psalm ij. vnd alles vber einen hauffen reissen / Psal. lxxxij. Dafür sol jm keiner zu hoch gefessen sein / Jerem. lj. Amos ix.

Es gefelt aber dem fromen Gott also wol / das er solch sein Regiment auff Erden ausrichtet / durch arme dürfftige Leut / so er darzu erfordert / auff das die vberschwentliche Krafft sey Gottes / vnd nicht von vns / sagt Paulus / ij. Cor. iij. Ist derhalben solcher Personen werck / nicht mehr / denn ein dienst / wie daher Propheten vnd Prediger / Gottes Knecht vnd Diener / oder auch sein maund genennet werden / das sie auff vnserem Herrn Gott bestellet / mehr nicht reden noch fürnemen sollen / denn Gott fürnimet vnd redet in seinem Wort / Wie Petrus spricht / j. Cap. iij. Wer da redet das ers rede als Gottes Wort. Vnd Paulus Rom. xv. Ich dürffte nicht etwas reden / wo nicht Christus dasselb durch mich wirckete / auff das also die kirche nicht von menschen / sondern warhafftig von Gott regieret vnd gelehet werde / Isa. liij. Joa. vj. Wie er denn auch gantz vnd gar allein / die zu leren hat / vnd sonst niemands / Darumb / das er allein ihr rechter



Vom Beruff der Prediger. 8.

rechter einiger warer Gott ist / Wie David spricht /  
Psal. xrv. vnd cxliij. **D**ER ZEIGE mir deine wege /  
vnd lere mich deine steige / lere mich thun nach dei-  
nem wolgefallen / denn du bist mein Gott / vnd **Deu-**  
**tero. iij. etc. xij.** Quod præcipio tibi, hoc tantum facie-  
ro, &c.

Das herrliche Gut / damit das Predigamt  
vmbgehet / ist kein Silber noch Gold / noch einiges  
vergengliches oder zeitliches Gut / darüber haben  
Keyser vnd König / Fürsten vnd Herrn / ja der Haus-  
uater vnd die Hausmütter zu regieren / Sondern es  
ist der hohe tewre Schatz / vnd das Himelische ewi-  
ge Gut in Christo Ihesu / das wir durch den haben /  
vergebung der schweren vntreglichen Bürden vnd  
last / so vns in die tieffe der Wellen sonst verdruckt  
hette / Nemlich vnserer Sünde / mit Gott versönet  
werden / vnd erben sind der künfftigen / ewigen / vnd  
vber alle mas wichtigen herrlichkeit / darinnen wir  
Gott schawen / vnd in einer solchen freude ewiglis-  
chen leben sollen / deren gleichen alhie keins Men-  
schen Auge gesehen / kein Ohr gehört / noch in eini-  
ges Menschen hertze mit gedancken komen ist / **i. Co-**  
**rinth. ij.**

Welchen derhalben nach solchem trost dürstet /  
nach diesen Gütern verlangen hat / vnd gedencet das  
ein ander leben nach diesem ist / der finde sich zum hei-  
ligen Predigamt / höre das wort vleissig / brauche  
der hochwürdigen Sacrament / vnd folge / vnd wif-  
se / das hie Gott keinem ein besonders machen wil /  
wer des Sones vnd herrlichen Schatzes genieffen  
C iij. sol /



### Vom Beruff der Prediger.

sol/dem lest ihn Gott fürtragen vnd Widerfahren / durch dis Ampt vnd nicht anderst / auch seinem liebsten Apostel Paulo nicht / denn da er denselbigen hart herümmer gerückt / vnd seines mörderlichen fürnehmens halben vom Himmel beschrien / darüber Paulus von hertzen bestürzt / mit seufftzen ruffet / Ach Herr / was sol ich denn thun? Wil im Christus ferner nichts sagen / sondern weiset ihn gegen Damascum / zu dem gemeinen Pfarherrn der Christen / Denselbigen höre von allem / spricht er / das dir zuthun verordenet ist / Acto. ix. vnd xxij.

Doch ist zum Predigampt nicht genug / recht vnd trewlich leren / vnd damit den werden ewigen Schatz den Leuten fürtragen / Sondern darzu gehöret auch / das gute vom bösen scheiden / Jerem. xv. auff das die fromen das böse von sich thun / i. Corin. v. Dasselbige fliehen / ij. Cor. vj. vnd also geheiligete gefesse sein / dem Herren zu ehren / ij. Timoth. ij. Davon wir hernach wollen mehr hören / weñ wir vom ampt der Prediger / worinnen das stehet / anzeigen werden.

### Das one Beruff niemand zu hören.

**W**iewolnu das Ampt vnd die Güter / so darinnen werden fürgetragen vud ausgetheilet / gleich wie die gantze gewalt der Schlüssel / ein gemeines Gut sind / der gantzen heiligen Christlichen Kirchen / daran / vnd darzu / one vnterscheid der Reiche vnd grosse / eben so viel recht vnd macht hat / als der Arm vnd Beringe / so viel den nutz vnd frommen derselbigen belanget / dennoch ist nicht aller zu gleich die macht vnd gewalt / das ampt zu führen / son  
der



Vom Beruff der Prediger. 9.

dem der jenigen allein / die darzu von Gott beruffen  
vnd verordenet sind / vnd haben wir hierbey zweierley  
vnterschiedene Leren in Gottes Wort. Erstlich das  
Keiner predigen sol / er sey denn darzu von Gott beruffen  
/ Denn so wenig derjenige kan des Römischen  
Keisers befehl ausrichten / an einigem stand im heiligen  
Reich / der nicht von der Key. May. darzu deputi-  
ret / vnd sonderliche Befehl entpfangen hat / ob er wol  
des guter massen berichtet ist / wes die Key. May. bey  
den Stenden anzubringen in willens ist / Eben so we-  
nig kan derjenige Gottes wort einer Gemeine fürtra-  
gen / welchen der liebe Gott nicht darzu verordenet /  
vnd ausgesand hat / Wie Paulus klerlich spricht / Ro-  
ma. x. Wie sollen sie predigen / wo sie nicht gesand  
sein? Haben derhalben eben dieser vrsach / alle Prophe-  
ten vnd Apostel jr Ampt an / von dem Beruff / gleich  
wie auch Joannes der Teuffer. Math. iij. aus dem  
Propheten Jesa. Cap. xl. Es ist eine ruffende stim in  
der Wüsten etc. vnd Joan. j. Es war ein Mensch von  
Gott gesand / der hies Joannes etc. Ja Christus der  
oberste Ertzhirte / da er seinen ersten Sermon thut zu  
Nazareth / niemet er das Thema vnd vrsach darzu /  
von seinem beruff / auch aus dem Propheten Jesaia /  
Cap. lxi. Der Geist des Herrn ist bey mir / derhalben  
er mich gesalbet vnd gesand hat / zu verkündigen das  
Euangelium / Luc. iij.

Aus welchem allem / weil sich zu anfang ihres  
Ampts / Propheten vnd Apostel / Christus vnd Jo-  
annes / als die höchsten Personen auff Erden / des  
entschuldigen / das sie nichts one Beruff fürnemen /  
Ist



### Vom Beruff der Prediger.

Ist wol zuerachten / das es ein gewlich laster mus  
sein/wider die art aller Gottseligen rechtschaffenen  
Lerer/wo sich jemand zu predigen selbst wolte ein-  
dringen/Es ist auch das wol zuerachten/ das darwi-  
der keine hoheit oder Præminentz / einige Person  
schützen oder verteidigen kan/weil weder Christum  
noch Joannem/Apostel vnd Propheten/ire hoheit  
der Personen / herrliche gaben / vnd vbermesliche  
grosse geschickligkeit/des nicht entniemet/ sondern  
müssen balde iren beruff im anfang beweisen / vnd  
mit gutem grunde darthun/das ist eins.

Zum andern / ob sich denn jemand gleich selb-  
best würde auffwerffen / sollen wir doch solche Pre-  
diger / die ohne ordentlichen beruff kommen gelauf-  
fen/auffstehen vnd predigen wollen / keines weg  
nicht hören/wie Gott spricht/ Jere.xxiij. Gehorchet  
nicht den Worten der Propheten/so euch weissagen /  
(vnter anderen auch dieser vrsach)denn ich sandte sie  
nicht/noch lieffen sie/ich redte nicht zu ihnen / habe  
inen nichts befohlen / noch weissagen oder predigen  
sie.Daraus du klerlich hörest / das Gottes wille vnd  
ernster befehl ist / solche keines weg zu leiden/  
die sich selbst/zunor ehe sie beruffen/herfür thun/sie  
sein auch wie gelert immer wollen / Findet sich auch  
in der warheit / das solche Leute keinen seggen von  
Gott haben / oder wie es Gott im Jeremia nennet /  
sind sie der Kirchen nichts nütz / richten nichts guts  
aus / weil sie nicht in Gottes Namen noch befehl/  
sondern wie es Christus heist/in irem eigenen namen  
kommen/Joan.v.

Erne



## Vom Beruff der Prediger. 10.

Lerne sich derhalben jedermenniglichen für sol-  
chen Schleichern zu hüten / vnd zweiffel nur nicht/  
sie geben es für / wie köstlich vnd gut sie immer wol-  
len / so lassen sie doch zu letzt einen stanck hinder sich /  
Wie man an Widerteuffern / vnd andern viel mehr  
Kotten / ein ebne gute lange zeit / mit grossen vnüber-  
windlichem schaden augenscheinlich erfahren hat /  
denn es sind des Teufels Apostel / sagt Lutherus / dar-  
über S. Paulus allenthalben klagt / darumb (spricht  
er) sey für ihnen gewarnet / vnd vermanet Geistlichs  
Ampt / sey gewarnet vnd vermanet Weltlich Ampt /  
sey gewarnet alles was Christen sein sollen / vnd Un-  
terthanen / das man sich für ihnen hüte / vnd höre sie  
nicht / Oder wer sie leidet vnd höret / der wisse das er  
den leidigen Teufel leibhaftig selbst höret / etc. Tom.  
v. Jenen: Deutsch / Im Büchlein Von den Schlei-  
chern / das magstu gar vleissig lesen.

## Was ordentlicher Beruff sey / Vnd wie macherley.

**W**Is daher haben wir mit gutem grund aus  
Gottes wort gehöret / wer anfenglich das Pre-  
digampt gestiftet / vnd wie Gott darinnen selb-  
best wircket vnd krefftig ist. Zum andern / Was das  
Predigampt sey / womit dasselbe vmbgehe / Vnd den  
zum dritten / das solch Ampt keiner führen kan / er sey  
denn ordentlichen darzu beruffen.

Hier ist nu die frage / Was ist denn ein ordentli-  
cher beruff / vnd wie geschicht der ? Antwort / dis ist  
**D** ordent-



### Wom Beruff der Prediger.

ordentlicher Beruff/wo sich einer nicht eindringet /  
weder durch sich selbst/ noch andere Leute / denn sol-  
che sol man nicht hören/ wie gesagt/ Sondern war-  
tet bis so lang er beruffen vnd geföddert wird / von  
Gott mit wunder one Mittel/ oder durch die jenigen/  
die es Ampts halben / vnd von wegen der Kirchen zu  
thun haben / vnd fürnemen / nicht zu ihrem gefallen /  
sondern nach Gottes wort vnd willen / Ist demnach  
dreierley Beruff / Wie es Paulus auch teilet / Gal. j.  
Einer der da geschieht von Gott / one Mittel / von kei-  
nem / auch durch keinen Menschen / Wie die heiligen  
Apostel vnd Propheten beruffen sind / welche Gott er  
fordert / durch besondere gesichte / Vnd wie es Pau-  
lus heist / durch Himlische offenbarung vnd erschei-  
nung / in welchen er sie erfordert vnd gesand hat / sein  
Wort der Kirchen fürzutragen / Oder hat persönlich  
mit inen geredet / nach dem er Mensch worden ist /  
Dieser Beruff hat nach der Apostel zeit auffgehört /  
das Gott der art keinen mehr gefordert hat zum Pre-  
digamt / Denn ob er wol wunderlich / eine Persone  
noch heute zu tage mehr erlenchtet / denn die andere /  
Wie wir erfahren / was grosse herrliche gaben / Er in  
dem thewren werden Man Luthero etc. gegeben / für  
allen anderen treflichen gelerten Leuten auff Erden /  
Deren Schrifften wol viel lieblicher schöner wort ha-  
ben / aber wenig sachen / Lutheri wörter eitel voller  
herrlicher gedancken / vnd köstlicher Himlischer lere  
stecken / das einer an einem Blat einen halben tag zu  
lesen / vnd er mit einem wort gar offft viel mehr gibet /  
denn vieler anderer grosse Commentaria etc. Denoch  
ist Lutherus nicht wie Paulus oder andere Apostel be-  
rufo



Vom Beruff der Prediger. 11.

ruffen / Sondern ist mit vns gemeiner art erfordert worden / wie er denn auch darumb sein Doctorat für aller welt güter rhümet / im Büchlin von den Schleichern / Ob derhalben sich dieses Beruffs itzund jemand rhümen wolte / sol man im nicht glauben / Der wenn er viel schwatzen wil / ihn nötigen vnd dringen / das er solchen Prophetischen vnd Apostolischen Beruff / mit klaren Göttlichen wunderzeichen beweise / wie Lutherns im selbigen Büchlein auch leret.

Die ander art eines rechten Göttlichen ordentlichen Beruffs / ist diese / das Gott Personen fordert zu dem Predigamt / Nicht aber one mittel / wie droben von den Propheten vnd Aposteln gehöret / Sondern braucht darzu der Kirchen / oder etlicher Personen / so der Kirchen darinnen von ampts wegen dienen / durch welche er solchen Beruff ausrichtet / Das heist Paulus durch menschen erfordert sein / Also haben die Apostel / Bischof oder Supperattendenten / Pfarherrn vñ Prediger beruffen / denselbigen auch widerumb befehl gethan / andere von Gottes wegen nach sich zu bestellen / wie du liesest 1. Tim. iij. ij. Tim. ij. vnd ad Ti. j. Vnd werden noch itzund dieser art / durch Pfarherrn vñ Obrigkeiten / auch durch andere dazu von der Kirchen verordente personen / Prediger beruffen / vnd das eben so wol von Gott / als Paulus von Gott beruffen war / aber nicht also / wie Paulus / sondern durch menschen / doch auf Gottes dienst / wie wir hernach weiter hören wollē. Vnd das solcher Beruff / so durch solche mittel geschicht / ebē so wol von Gott sey / als der Apostel vñ Propheten / ist klar / Denn Paul: hatte Timotheum gen Ephe: zum Superattendentē erfodert /



### Vom Beruff der Prediger.

derselbige auch fortan / nach dem befehl Pauli j. Ti-  
mo. iij. andere mehr zu Ältesten oder Predigern veror-  
denet / Vnd dennoch spricht Er / Acto. xx. Habt acht  
auff euch selbst / vnd auff die gantze Herde / vnter wel-  
che euch der **HEILIGE GEIST** gesetzt hat zu  
Bischoffen etc. Die hörestu klerlich vnd fein / Wer  
hat Timotheum zum Superattendenten gemacht  
gen Ephesum? Vnd wer hat den anderen befehl ge-  
than? Sagt Paulus / das hat Gott der heilige Geist  
gethan / vnangesehen das der heilige Geist persönlich  
mit der Keinen darumb geredet / sondern Paulus mit  
Timotheo / Timotheus mit den anderen etc.

Vber diese zweierley art Göttlichs ordentlichs be-  
ruffs ist noch einer / aber nicht Göttlichs beruffs / der  
geschicht nicht durch menschē / sondern von menschē /  
das ist / nicht durch sie als von Gott durch ein mittel /  
sondern sie beruffen aus eigener habender autoritet /  
Krafft / macht vnd gewalt / mit freier willkür / für sich  
selbst / nach irem gefallen vnd willen / wie sie gelüftet /  
vnd das greiffet oder spüret man sonderlichen vnter  
anderen fein darbey / denn sie beruffen nicht / wie Got-  
tes wort leret / auch nicht aus vorstehender not der  
dienst / das dieselbigen ledig stünden / vnd die Kirche  
an Predigern mangel hette / die dienst sind vorhin  
schon bestellet / durch ordentlichē rechten Göttlichen  
beruff der Personen / so im Ampt sind / Allein man re-  
det vnd prediget das jenige / welches den grossen Her-  
ren / Land vnd Leuten / Stedten vnd Dörffern / zu gar  
vnleidlich ist / spricht der schand heucheler Amazias /  
Amos. vij. Darumb sucht vnd berufft man andere  
Prediger /



Vom Beruff der Prediger. 12.

diger/one zweiffel aber nicht in Gottes Namen / wie weder mit der heiligen Schrift / noch einigem Exempel nimmermehr zu beweisen / derhalben geschicht solches one Gott als von Menschen.

Für solchem Beruff warnet vns Paulus gar trewlich / one zweiffel / als der zu verstorung vnd verderbe der lieben Kirchen greulich dienet / Sagt aber das er zu der letzten zeit / leider werde gar gemein werden / das aus bittere has vnd neide der lieben warheit (Nicht da man das Euangelium prediget / wie daruber kein Prophet erwurget vnd verfolget ist / saget Lutherus vber das xvij. Cap. Gene: Sondern das man drawet / strafft vnd ermanet mit allem ernst) die Leute nach iren eigenen lusten werden inen selbst Lerer auffladen / nach dem inen die Ohren jucken. Liese es selber / ij. Timo. iij. vnd las derhalben auch alle Welt darvon halten / was sie wil vnd immer kan / Bleibe du darbey / weil der Apostel daruber schreiet / vnd vns so hertzlich warnet / So müssen beide die jenigen so dermassen beruffen / vnd die sich also beruffen lassen / verdammet / verloren vnd des Teufels sein / der vns durch solch fürnemen / wo im Gott nicht steuren vnd weren wird / in kurtz vmb die reinen Lere / vnd damit vnsere armen Nachkomen / vmb irer Seelen heil vnd ewige Seligkeit gewislich bringen wird / vnter keinem anderen / denn eben dem Euangelischen namen vnd schein / Christen mögen beten es thut von nöten.

Ob jemandes möge seine dienst an  
D 3. hie=



Vom Beruff der Prediger.  
bieten / Vnd welcher weise das gesche-  
hen köndte.

**D**Is ist auch gar eine nödtige frag/wenn ein gu-  
ter fromer Man/eine zeitlang gestudieret/vnd  
mitt allem vleis dahin gearbeitet/mit lesen vñ  
anderer Gottseliger vbung/das er dem lieben Gott in  
der kirchen dienen möchte/Wenn der nun zimlich die  
fürnembsten heuptstück der Christlichen lere gefasset  
hat/ob denn der nicht köndte mit gutem gewissen sei-  
ne dienst einer kirchen / die eines Predigers bedürffte  
anbieten? Daraus antwort Paulus / das ein solcher  
damit nicht allein nichts vnrechts / sondern ein köst-  
lich gut werck begere / i. Tim. iij. Vnd was kan auch  
köstlichers auff erden gedacht werden / denn das ein  
Mensch das sucht/vnd sich darein begibt/Er wil sei-  
nem Gott/dem er zu ehren geschaffen/dienen/vñ dem  
Nechsten in der kirchen vnd gantzen Gemein/ wie er  
schuldig ist/zu zeitlicher vñ ewiger wolffart nütz sein/  
in dem stand oder Ampt/so von Gott eingesetzt/vnd  
dermassen/wie es derselbige verordenet hat? warlich  
wer das sucht vnd begeret/ der begeret freilich nichts  
anders/denn das Gott von hertzen wolgefelt/ Dar-  
ümb kan es ihm niemand verargen/denn der leidige  
Teufel / vnd sol billich denselbigen/in solchem / Gott  
angenehmen heiligen fürnemen vnd werck / niemands  
hindern/Sondern alle welt gern fördern/fürnemli-  
chen aber die jenigen/so es in der kirchen von Ampts  
wegen zu thuen befehl vnd macht haben.

Es finden sich aber vnter diesem heiligen schein/  
auch



Vom Beruff der Prediger.

13.

auch zweierley gewölichelaster/die sich hierüter schim-  
cken/vnd in der kirchen nichts güts ausrichten. Das  
erste/ Das die Schleicher/ so sich gern wolten eindrin-  
gen/oder eindringen lassen / diesen spruch Pauli me-  
sterlichen können anziehen/vnd zu ihrem Schandes-  
ckel gebrauchen/denn wie kan ihr fürnemen nun ver-  
dammet sein/Sintemal Paulus hie klerlich sagt/Ei-  
nes Bischoffs oder Predigers ampt begeren / sey ein  
köstlich ding für Gott? Zum andern / so finden sich  
viel guter fauler Beuch vnd Schleich/die gedenccken  
das Predigampt stehe ferner in keinen dingen nicht/  
denn das ein Pfarherr ein Buch in die hand niemet/  
lieset etwas von der Cantzel dem Volck für/ fehret dar-  
auff an etwas von Christo zu schwatzen/oder von an-  
deren dingen/so gut er kan/Weil nu den faulen tropf-  
fen der kneip in der faust drucket/ das er nicht gern ar-  
beitet/vom Predigampt aber mehr nicht helt / denn  
es sey ein müßiger Stand/ da one sorg vnd arbeit/ei-  
nem eine gebratene Taube ins maul flenget (also viel  
weis er vom Predigampt / vnd so ein feiner Christen  
ist er) Darumb dencket er / so starck bistu ja auch/  
das du noch ein Buch in der Hand ertragen kanst/  
So kanstu auch eine stunde mit schwatzen zubrin-  
gen für die lange weile / Derhalben setzen solche Ges-  
ellen den Schemel zu rücke / kommen gelauffen /  
vnd wollen ohn aller Welt danck Prediger sein /  
Suchen aber auff Erden höhers nicht / wie gesa-  
get / denn das sie mögen der sauren arbeit in ihrem  
Beruff los sein / Vnd gleichwol jerlichen was  
haben / darvon sie den Kump vnd Schlauch  
mögen



### Vom Beruff der Prediger.

mögen ernehren / Solches aber heist dem leidigen  
Bauch vnd nicht Christo dienen / saget Paulus Ro-  
ma. xvi.

Auff das nu die Kirche durch Schleicher vnd  
Faullentzer / dermassen nicht betrogen / vnd der jeni-  
gen fürnemen / so ire dienst der Kirchen Christlich an-  
bieten / darnon recht vnterscheiden werden / So sol  
man auff diese Regeln vleissig achtung geben. Erst-  
lich das derjenige / dem es nicht vmb seinen bauch /  
sondern vmb das Ampt / Gottes Ehr / vnd der Kir-  
chen wolfart ernstlich zuthun ist / sich darzu nimmer  
mehr begeben wird / das er sich einen andern fromen  
rechtschaffenen Prediger / so bereit im Ampt ist / zu  
nachtheil vnd verdruck würde gebrauchen lassen /  
Sondern wird betrachten / das man one zweiffel an  
im nicht suchet / das er solte die sachen im ampt nach  
Gottes wort vnd willen recht ausrichten / denn einen  
solchen hat man vorhin / kan in aber / eben der vrsach  
nicht dulden noch leiden / das ers machet / wie Gott /  
vnd nicht wie die Welt wil / Darumb wird kein red-  
licher Man / der da gedencet sein gewissen zuerwas-  
ren / sich an seine stet befördern lassen / Schleicher  
vnd Bauchknecht fragen nicht darnach / denn es ist  
inen weder vmb das Ampt / Gottes ehr / noch der leu-  
te Seligkeit / sondern vmb den faulen Bauch vnd  
Schlauch zu thun.

Zum andern wird sich derselbige / der das ampt  
begeret / vnd nicht faule gute tage / demütig vnter ge-  
ben dem vrteil / derjenigen / so es in der Kirchen von  
Amptswegen zuthun vnd auch verstand haben / vnd  
diesel



Vom Beruff der Prediger. 14

dieselbigen richten vnd erkennen lassen/ nach der Regel/wie Paulus fürgeschrieben/j. Timo. iij. ij. Cap. ij. vnd ad Titum. j. Ob er zum dienst der Kirchen genug/ vnd dieselbige seiner wiederde können zu irer seligkeit geniessen vnd gebessert sein/ Den da er vernemen würde das er zu wenig/ vnd in der Kirchen nicht köndte nutz schaffen/wird er solch Ampt/ so zur besserung vnd erbawung verordenet/ vnd vns befohlen ist / ij. Cor. x. vnd xiiij. nimmer mehr begeren/ Dargegen abermals Schleicher vnd faule Beuch/das Judicium vnd erkentnis bey niemands lassen wollen/ Sondern es geschehe zu verderb oder vntergang der Kirchen/wie es wil/so trachten sie darnach/wie sie an fürgenommenen orten mögen ires fürhabens die Pfarren bekommen/ Wer den irer dienst gebessert sey oder nicht/da fragen sie nicht nach / wasschen vnter des/ vnd predigen in hauffen/ können aber nicht lernen / weil sie selber von den hohen Göttlichen sachen keinen gründlichen verstand haben/ vnd ist ir schwatzen eben als eine Pfeiffe oder Harpffen / darauff ein vngeschickter Tölpel stumpelt/ Gibt aber kein vnterschiedliche stimme / j. Cor. xiiii.

Für solchen sol man sich hüten / vnd nicht achten/was sie zu ihrer beschönigung aus dem Spruch Pauli droben anziehen vnd fürwenden / Denn obs wol war ist / wer eines Bischoffes Ampt begeret / der begeret ein köstlich werck / So ist widerumb auch war/das solche Gesellen des Ampts nicht begeren/sonst würden sie sich darzu schicken / auff das sie dasselbige auch könten rechtschaffen ansichten /

L

nicht



### Vom Beruff der Prediger.

nicht nach irem/ sondern nach dem vrteil Pauli/ dar-  
ümb würden sie auch nicht wünschen sich der ort  
gebrauchen zu lassen/ Wo sie nicht könten das ampt  
mit gutem gewissen also füren / wie es von Gott ver-  
ordenet ist.

Welchem es aber von Hertzen ein ernst ist/ vnd  
suchet warhafftig das Ampt vnd den dienst / zu ehre  
Gottes/ vnd besserung der Kirchen / der wird vleissig  
studiren/ damit er auch andere leren könne/ wie Pau-  
lus haben wil. Zum andern wird er seine dienste an-  
bieten/ mit solcher demut/ das er das erkentnis an die  
jenigen stellen wird / denen es in der Kirchen befoh-  
len/ vnd es nach Gottes Wort ausrichten. Zum drit-  
ten / Wird er sich nimmermehr an den ort gebrau-  
chen lassen/ da man trewe frome Lehrer / vnerkantes  
rechten verstoßen / vnd des keine Busse gethan hat/  
denn also keme er/ als ein Dieb vnd Mörder/ der sich  
selbst eingedrungen mit gewalt/ als ein Renber Gött-  
lichs Ampts/ vnangesehen/ wenn er gleich durch or-  
dentliche Obrigkeit darzu befördert were/ Also vrtei-  
let vnd schreibet Lutherus/ Tom: v. Jenens: Deutsch.  
fol. 358. & sequenti.

### Wer denn Prediger zu beruffen ha- be?

**H**iermit komen wir auff die rechten heubtfrage/  
daran fürnemlich alles gelegen / vnd ist itzund  
darüber ein grosser zanck vnd hader / bey wem  
denn die gewalt stehe/ Prediger zu beruffen/ denn aus  
dem



## Vom Beruff der Prediger.

15

Dem wil ohne zweiffel folgen/das derselbige auch widerumb macht vnd gewalt habe (seiner massen) Prediger abzusetzen / vnd sind fürnemlich dreyerley Opinion oder meinung. Etliche als vnser Papisten / wollen / das allein die Bisschoffe solches zu thun haben / Darumb sie die jenigen / so von keinem Bepstlichen Bischof erfoddert oder geschmieret sind / nicht für rechtschaffene Diener der Kirchen halten. Die anderen geben es allein / oder ja fürnemlich / der Weltlichen Obrigkeit / das dieselbige diese Christliche Frey vnd Gerechtigkeiten / an wahl / Beruffung / vnd Bestellung der Kirchendiener habe / dere sie auch keinerley weise sol oder möge entsetzet vnd beraubet werden / das sie dieselbigen zu vocirn / auch widerumb zu vrlauben habe nach ihrer gelegenheit / Wie sie denn das large, largius, largissime verstehen / vnd den Herren weidelichen darmit heuchelen. Die dritten sagen / Es gehöre dem Gemeinen hauffen in der Kirchen / das dieselbigen mögen zusammentretten / vnd auffwerffen zu einem Prediger / wenn sie wollen / Geben für / das solches Lutheri / Cypriani / vnd anderer heiligen Veter Lere vnd meinung sey.

Weil denn solche meinung gar verkerter weise gemeiniglich verstanden / vnd zu allem mißwillen / wider Gottes wort greulich misgebraucht werden / So lerne du dargegen aus Gottes Wort / vnd lass dir nimmermehr ausreden / das niemands Prediger zu fodderen oder zu Beruffen hat / denn GOTT alleine / vnd lass dich nur nicht irren /

L ij

Was



### Vom Beruff der Prediger.

Was dargegen angezogen / oder furgebracht wird  
aus Luthero / oder einigen andern Lerern / Sey du  
gewisse / das solche Lutherum nicht verstehen / oder  
aber (das der Teufel selbst ist) misbrauchen solche  
Leute mit gutem fursatz Lutheri Schrifften / zu irem  
mutwillen vnd boshafftigen furnemen. Ist aber die  
kurtze vnterschiedliche vnd richtige antwort / auff all  
ir furbringen / das Lutherus an dem nie gezweiffelt /  
noch zweiffeln können / weil es zu klar / das Gott allei  
ne Prediger zu beruffen / Sondern dauon redet er  
allein / durch wen Gott beruffe / in der not / oder dr  
dentlicher weise auffer der not / las sehen / was sie dar  
gegen / vnd vber solchen vnterscheid aus Luthero wer  
werden auff bringen. Das es aber dem lieben Gott al  
lein zugehöre / Prediger zu beruffen / ist aus folgenden  
Sprüchen / starck / lanter vnd klar bewiesen / Denn vn  
ter anderen gewissen eigenschafften vnd Merckzei  
chen / darbey Gott wil von allen Abgöttern vnters  
cheiden / vnd für den allein rechten waren Gott er  
kand vnd auffgenommen werden / Zeuchter die beiden  
stück fürnemlich an / Jesa. xiiij. Das er sein wort gie  
bet / vnd seiner Kirchen rechtschaffene Prediger sen  
det / vnd spricht / Ich bin der erste / der zu Zion sagt /  
Sihe da ist / vnd gebe Jerusalem Prediger / Vnd Je  
re. iij. Ich wil euch Hirten geben nach meinem Her  
zen / die euch weiden sollen mit Lehre vnd weisheit /  
etc.

So leret vns Christus gar fein vnd bescheiden /  
wenn es vns an Predigern mangelt / wo wirs suchen  
sollen / vnd spricht / Matth. ix. Bittet den HERRN  
der



Vom Beruff der Prediger. 16.

der Erndte/das er arbeiter sende in seine Erndte. Die Hörestu beides/das Gott Prediger zu geben/darumb es auch seine gaben / vnd eben solche Göttliche geschencck genennet werden / die Christus mit seinem tewren blut erworben / vnd in seinem herrlichen Triumph / da er gen Himel gefahren vns verehret hat/ Psal. lxxviii. Ephe. iiii. Das ist eins. Zum andern hörestu auch hieraus zu gleich / guten grund vnd vrsach/ Warumb Gott allein Prediger zu senden oder zu beruffen hab / Denn in dieser Ernte oder arbeit ist niemands Herr/denn Gott allein/ Darumb Obrigkeit vnd andere Leut / vber Pfarherren vnd Predigampt so viel recht haben / vnd viel weniger / als der Teufel am Himmelreich/schreibet Lutherus / Tom. Jenen. viii. Deutsch fol. clxxxix.

Ja sprichstu/hastu doch selber droben bekand/das dis ein ordentlicher beruff sey/wenn ein Prediger von der Obrigkeit / oder anderen Personen / denen es die Kirche befohlen/zum ampt erfordert wird / ohne zweiffel / so mus Obrigkeit das zuthun macht haben. Antwort/Wenn die Kirche oder die Obrigkeit / vnd wem es die Kirche befielet/ Prediger foddern/so thun sie es nicht für sich / wie sie es auch nicht thun sollen / Denn also köndt ein Prediger keinen Göttlichen beruff haben/als durch Menschen/ sondern were beruffen one Gott von Menschen/Was aber Paulus darvon halte / haben wir droben gehöret/Darumb (wo es recht zugehet) lassen sich Obrigkeit vnd andere/darzu mehr noch anders nicht gebrauchen / denn als mittel / durch welche Gott selbest Prediger  
E iij                      bestellt/



### Vom Veruff der Prediger.

bestelt vnd zum dienst der Kirchen verordenet / weil ohne Mittel er itzund keinen mehr foddern wil / Der halben sol auch Obrigkeit / vnd durch wen es im Namen der Kirchen von Gottes wegen geschicht / dar auff vleissig achtung geben / das sie in der Beruffunge der Prediger anders nicht handelen / denn wie es GOTT wolgefelt / Ruffen erstlich denselben von Hertzen an / das er mit vnd bey dem Werck sein wolle / dasselbige zu seinen ehren / durch sie / selbst wol ausrichten. Zum Anderen / Welche Personen denn dieser art sind / nach Gottes Wort / das sie Gott haben wil / die sol Obrigkeit auch haben wollen / So lange sie denn Gott im Ampt leiden kan / sol sie die Obrigkeit auch leiden / Wenn sie es aber machen / das es Gott nicht leiden kan / vnd der halben Er sie wil des Ampts entsetzet haben / dieselbigen sol die Obrigkeit vnd die Kirche auch nicht leiden / Sondern verschaffen / das sie aus dem Ampt gesetzt werden / abermals wie Gott wil / vnd anders nicht / Vnd welche denn dermassen entsetzet werden / die sind one zweiffel von Gott entsetzet / Gleich wie sie von Gott warhafftig erfoddert sind / die durch Ordentliche Mittel zum Ampt beruffen werden / wie droben genugsam bewiesen ist.

Also kan Obrigkeit einen Papistischen Pfaffen oder Schwermer nicht foddern / noch leiden ( Ich rede de lure, nicht defacto) Sondern ist schuldig dieselbigen abzusetzen / vnd hinweg zu schaffen / dar umb das Gott solche nicht leiden kan / wie er spricht  
Dsee



Vom Beruff der Prediger. 17.

Dsex.iiij. Weil du mein Wort verworffen hast / vnd nicht achtest / so hab ich dich widerumb verworffen / das du nicht solt mein Priester sein / Dargegen kan Obrigkeit einen rechtschaffenen Lerer nicht absetzen / weil er es macht in seinem ampt / wie im Gott befohlen hat / Denn einen solchen kan Gott nicht allein leiden / sondern drawet durch den Mund seines liebsten Sones / wer ihm den Prediger verachtet / der sol seine Maiestet damit zu gleich verachtet / vnd seinen Auge Apffel gerüret haben / Luc.x. vnd Zach.ij. Ohne zweifel / so mus damit bey solchen Leuten / Gott / sein Euangelium / vnd rechter warer Christlicher glauben begeben vnd verloren sein / vnd der Teufel sie selbst regieren / Sintemal vnmüglich / wo Glauben / Euangelium / vnd der heilige Geist im Hertzen ist / das alda Gott der Vater / vnd Christus Ihesus vnser liebster einiger Heiland solte verachtet werden / Darumb ist vnmüglich das ein rechtschaffener Prediger solte von solchen verachtet werden / weil in Gott beruffen vnd haben wil.

Ach lieber fromer Gott / was sol doch ein Prediger recht leren / wie kan er doch sein Ampt von ganzem Hertzen / mit allen trewen meinen vnd ausrichten / Vnd wes kan er sich trösten / wenn er das nicht gienbet / das er von GOTT selbst vnd keinen Menschen / zu dem Ampt bestellet vnd beruffen sey ? Vnd wie ist möglich / das auch ein einiger Mensch solte von seinem Prediger was dulden vnd für gut annehmen / im harten straffen / vnd ernstlicher Vermanunge ( Wie dasselbige sein muss )  
weil



### Vom Beruff der Prediger.

Weil er denselbigen nicht anders ansihet / denn einen  
Sewhirten / den hat ein gemeine Dorffschafft ange-  
nomen / wenn er inen denn nicht lenger gefelt / mögen  
sie ihn durch den Dreck zum Dorff widerumb hin-  
aus jagen. Man darff nicht fragen / woher es kome /  
das ein gros theil vnter den Predigern sich so leicht-  
fertig / schendlich vbel in irem Ampt halten / vnd war-  
umb so gar wenig Leute / die Lere von hertzen / mit  
Christlicher Gottseliger demut / zu irer besserung auff-  
nemen / vnd warhafftig dem Euangelio gehorsam  
sind. Die steckt der Putzen / da leit der Brunne vnd  
Quelle / daher es alles kömet / vnd gewislich komen  
mus / Niemand oder ja gar wenig betrachten vnd  
glauben / das der Prediger von Gott beruffen / an vns  
gesand / vnd als eine besondere Gabe verehret sey /  
Christen thun es allein / Wie auch Paulus von seinen  
Galatern rhümet / cap. iiii. Als einen Engel Gottes  
habt ir mich auffgenommen / ja als Christum Ihes-  
sum / wie waret ir dazumal so selig. Die Augen hettet  
ir ausgerissen / vnd mir gegeben etc.

Wolan so las den Gottlosen hauffen fahren /  
merck aber vnd lerne du / das Gott allein Prediger zu  
beruffen / darumb auch zuentsetzen / Was aber die Kir-  
che oder Obrigkeit darbey thut / das sie solches nicht  
thun / noch thun könen / aus habender eigener krafft  
vnd macht / die sie vber die Pfarherren vnd das Pre-  
digampt hetten / Sondern ir werck (wo es recht zuge-  
het) ist ein dienst vnd mittel / dadurch Gott sein werck  
ausrichtet / weil er solches ohne Mittel nicht mehr  
thun wil.

Es ist







### Vom Beruff der Prediger.

statten solte / wie auch das zuuor im Concilio zu Antiochia beschlossen war / Cap: xvj. Nicht aber gar lang hernacher / haben es widerumb die Bischoffe auch gar allein an sich bringen wollen / Darumb im Concilio Carthaginensi. iij. Cap. xxij. beschlossen ward / das ein Bischoff one der anderen Pfarherren / vnd der Gemeine zeugnis vnd bewilligung / Keiner solte ordinieren.

Es ist aber Christliche Obrigkeit / so fern sie Christen gewesen / nie darvon ausgeschlossen / sondern haben in solchem wichtigen Dandel helffen mit zurathen / vnd zusehen / das alles recht schaffen ist furgenommen / Wie Valentinianus hat Ambrosium helffen mit eruelen / Eusebins lib: xj. Eccles: Disto: cap. xj. Vñ Theodoritus lib. iij. cap. vi. vnd vij. Bis der grosse Drach zu Rom / der lebendige wutende Teufel in dem Antichrist / Obrigkeit / Prediger / vnd Gemein darvon gestossen vnd gedrungen hat / sich der sachen allein vnterstanden / vnd itzund damit gedendet das Euangelium vnd reine lere gar zu dempffen / das keiner sol zum Predigamt vnd reichung der hochwirdigen Sacrament genug vnd tuchtig sein / wo er nicht von ihm darzu erwehlet vnd geschmieret ist / Was wir aber in dem fall / da Papsst vnd Bischoff kein Paulus / Titus noch Timotheus / sondern der Teufel selbst / vnd reissende Wolff sind / wider sie fur guten grund haben in Gottes wort / das liese in dem Buchlin Lutheri / das ein Christliche Gemein recht vnd macht habe / Lerer zu beruffen / Tom. ij. Jesen: fol. ccxliij.

Dar:



Dargegen aber / wo es itzund widerumb rich-  
 tig vnd recht sol zugehen / vnd man gelerte frome Su-  
 perattendenten vnd Pfarherren haben kan / sol die  
 Obrigkeit sich solcher sachen auch keines weges al-  
 lein vnterstehen / sondern dieselben darzu nemen / die  
 der sachen verstand haben / Denn wenn es bey der  
 Obrigkeit allein sein solle / wie keme denn Paulus dar-  
 zu / das er an Timotheum vnd Titum schreibet / sie  
 sollen neben der Gemein solch werck auszurichten  
 haben / vnd sonderlichen bey inen das Judicium ste-  
 hen / welche Personen zu dem ampt duchtig sein oder  
 nicht / Zu dem das in dieser gefehrlicher zeit / da der  
 Teufel nicht feiret / fleisch vnd Blut nicht gut / die len-  
 te wunderlichen vnd fürwitzig sind / die notdurfft der  
 Kirchen / gemeiner fried / eintracht in der Lere vnd le-  
 ben / so wol als der vnterscheid vnd eigenschafft Welt-  
 licher vnd Geistlicher Regierung / solches erfordern /  
 Darvon magstu abermals Lutherum lesen / Tom. vj.  
 Jenen : Deutsch / fol. cccxxvj. / vnd sey das von dem  
 Mittel / dardurch Gott Prediger beruffet genug-  
 sam.

### Welche zum Predigamt sollen be- ruffen werden?

**D** Jeweile es Gottes werck sein mus / Prediger  
 zu beruffen / wie bisher genungsam angezeigt  
 vn̄ erwisen ist / widerumb aber Gott one mittel

f ij itzund



### Vom Beruff der Prediger.

itzund keinen beruffen wil / so geschehe es zu jederzeit  
ordentlicher weise / durch wen es kan! Dennoch mus  
fürnemlich diese Regel gehalten werden / das man  
darauff für allen dingen vleissig achtung gebe / wel-  
che Gott in seinem dienst leiden köndte / vnd derhalb-  
ben wolle darzu beruffen haben / vnd weil er eben der  
vrsach dauon klaren bericht gegeben in seinem wort/  
So ist kein zweiffel / wo man vber solchen Bericht/  
dem Herrn Christo wolte fürgreiffen / vnd wie ers sel-  
best heist / für im herkommen / da würde man nicht Pre-  
diger vnd Diener Christi / sondern Dieb vnd Mörder  
auff die Kirchen bestellen / Joan. x. Darumb wo man  
nicht des leidigen verderbten Bluts vnd fleisch / so  
wol als des Teufels mutwillen / wil ausrichten / son-  
dern warhafftig in fürhabens ist / das Ampt recht zu  
bestellen / zu ehren vnd willen Christo vnserm lieben  
Heiland / vnd zu nutz der armen Kirchen / da neme  
man vleissig diese Regel für / das man kein andere Per-  
son erwele / vnd in das Ampt setze / denn die Gott lei-  
den kan.

Es hat aber Paulus diese Regel fein kurtz vnd  
rund gefasset / wie die Person sol geschickt sein / die  
Gott zu diesem Ampt haben wil / Erstlich sol sie ires  
lebens halben vnstreflich sein / das sie keines groben  
lasters mit warheit köndte bezichtiget / vnd vberwie-  
sen werden / i. Timo. iij. vnd ad Tito : j. Denn ob wol  
dem lieben Gott / vnd der krafft seines worts / daran  
nicht gelegen / vnd er eben so wol durch einen bösen  
Buben kan teuffen / predigen / vnd die leut selig ma-  
chen / als durch einen fromen Gottseligen Man / wie  
es



Vom Beruff der Prediger. 20.

es eben so wol rein vnd schön Gold ist / was ein König dem Betteler / durch eine schurfichte hand eines Dieners / als durch eine reine Hand mit viel ringen geputzet / reichen leset / so ist im aber der armen Kirchen halben / vnd blöden gewissen / daran gelegen / auff welche er seine dienst bestellet / das vmb der bösen Buben willen / wo sie ins Ampt gesetzt werden / sein heiliger vnschuldiger name gelestert / Rom. ij. greuliche ergernis angerichtet / Matth. xvij. Vnd damit die arme Kirche eines grossen theils nicht erbawet / sondern greulich wird danieder gerissen vnd verwüestet / ij. Cor. xij. Darumb auch Christus das stück den Phariseern vnd Schriftgelehrten auffrücket / das sie andere lehren / denselbigen grosse Bürden auffladen / sie aber selbst mit keinem finger anrühren / Math. xxij. Summa ein Prediger sey wie gelert er wil / predige recht / vnd lere wie schön er immer mehr kan / ist er darbey selbst ein vnflat vnd Seuffer / oder mit anderen groben lastern beladen / so macht er doch den armen Zuhören zum aller wenigsten den wan / das sie dencken / es sey nicht halb so ernst mit der predigt / wie es doch wird fürgegeben / sonst würde sich der Prediger selbst viel anderst darzu schicken.

Zum Andern / sol eine solche Person / so zum Ampt erfordert wird / können lere / Dierzu gehöret nun gar viel / Denn es ist ja war / das Moratius sagt.

Quodq; parum nouit, nemo docere potest.

Darumb sol die Person zuuor gestudieret haben /

§ iij

vnd



### Vom Veruff der Prediger.

vnd der fürnembsten Heubtstücke reiner Christlicher  
Lere zimlichen guten / vnd aus Gottes wort gründli-  
chen verstand haben / Solchen verstand nachmals  
auch fein bescheiden / mit guter ordnung / köndten  
deutlich vnd klar / den Zuhörern fürtragen / Das er  
rechte mas halte / die Zuhörer nicht auff ein mal vber  
lade / Vnd in Summa / sol er ein guter einfeltiger Cas-  
techismus Prediger sein / des die Gemeine also gebes-  
sert möge werden / das man an irem verstand vnd le-  
ben / des Predigers vleis vnd erbeit / mit grossen nutz  
vnd frucht erfahren könne / ij. Co. ij.

Zum dritten / ist noch eines sagt Paulus / das  
Gott für allen fordert / nemlich ein fromes getrewes  
Hertz / i. Cor. ij. Wenn es an dem mangelt / so ist alle  
Kunst verloren / die arme Kirche / vnd der frome Gott /  
(Ich rede de DEO reuelato & prædicato, das verste-  
hest du wol) darinnen selbest / mit aller seiner wolthat  
in Christo Ihesu / verraten vnd verkaufft / Denn wer  
es nicht von Hertzen mit der Kirchen / vnd seinem  
Ampt trewlich meinet / was fragt der darnach / wer  
da lerne oder nicht lerne / gebessert oder geergert / selig  
oder verdammet werde / zum Teufel oder gen Himel  
fare / an wem das Blut Christi verloren oder zu trost  
angelegt werde. Nach dem ein solcher siehet / das er  
kan gunst vnd willen / gelt vnd genies / fried vnd ehr /  
ein vollen Kropff vnd Schlauch darvon haben /  
nach dem schweiget vnd redet er den Leuten zu willen  
vnd gefallen / vnd verderbet also dis einige stück / nem-  
lich die schendliche vntrew / der Kirchen vnd dem fro-  
men Gott alles zumal.

Widerumb



Vom Beruff der Prediger. 21.

Widerumb aber wo ein trewes Dertz ist/ der sor-  
get/wie es dem lieben Gott seine sachen wol ansrich-  
te/vñ alle welt selig mache/so viel an jm gelegen/dar-  
umb studieret es/vñ lieset/.i. Terrij. Syr:xxxix. Vnd da-  
mit es nichts verderbe/ists der Herde ein gutes fürbil-  
de/.i. Pet.v. Betet nebē der arbeit vleissig für die kirche  
.i. Sam:xij. verschweiget nichts/Act:xx. Stehet wider  
den Wolff/vnd setzt leib vnd leben daran. Ioan.x.

Ja sprichstu das ist ein *Idæa platonica*, Wor wol-  
len wir solche Leute nemen? Antwort / Begeren wir  
doch/vnd wünschē vns der nicht / warumb wolt  
jm denn jemandis wehe thun / sich auff diese weise zu  
schicken? Es gehet wie jener saget / Das Viehe wie  
der Stall/vnd Jesaias cap.xxiiij. *Sicut populus, sic &*  
*sacerdos*, Wir leben von dem Obersten bis auff den  
vntersten / in fressen / sauffen / allen willen vnd wol-  
lust/thut ein jeder was jm gefelt / gleubt was er wil/  
gibt auff vnsern Herrn Gott niemands nichts / wil  
auch wie droben gesagt/von jm vngestraftt sein/ one  
bus vñ besserung immer seiner weise nach bleiben ein-  
mal wie das ander/Darumb suchen wir auch solche  
leute/die vns geweren lassen/nichts einreden, selbst le-  
ben/vñ vom Predigamt halten wie wir/also hat kei-  
ner dem andern nichts auffzurückē / Was es aber bei  
de teil an jenem tag genieffen werden/ das sollen wir  
dem Propheten nicht gleuben/Eze: iij. sondern es erfa-  
ren/Es ist vnser rechte verdiente plag/ das wir solche  
Leut suchen / die vns bey aller vnserer sünde vnd bos-  
heit/nichts denn von eitel Honigsüßer gnade sagen/  
bis sie vns damit zum lande hinaus predigen / Tre:ij.  
Das.



### Vom Beruff der Prediger.

Das heist denn eitel Friede/ Jere. xxij. Aber solche wie gesagt/wil die Welt haben / Micha: ij. Vnd geschicht ihr recht / Dilexit maledictionem, & veniet ei, Psal. 109.

Gleichwol sind ja noch etliche frome Hertzen vnter den Predigern / die sich nach dem Bilde / vnd fürgeschriebenen Regel droben rechtschaffen halten / Ob nu dieselbigen wol am wenigsten werden geachtet von der Welt / so ist auch daran nicht gelegen / weret jr von der Welt / sagt Christus / so hette die welt das ire lieb / Joan. xv. Were derhalben ein gewis zeichen / das wir Christi Diener nicht weren / schlenst Paulus aus diesem grunde gar starck / Gal. j. Es gehet mit der Welt / irer alten weise nach / wie der Verss heist.

Quod sequitur fugio, quod fugit, ipse sequor.

Wer sie von Hertzen suchet / dem ist sie feind / die grobe Terrin / schonet auch ires fromen Gottes von Himmel darinnen nichts / der wolt sie selig machen / Darumb verdampft sie in / der Teufel im Bapst verdammet sey / den wolt sie in den Himmel haben für den allerheiligsten / schlept vnd trug im zu / aus allen winckeln / Gold vnd Silber / gros Gelt vnd Gut / etc. Ist derhalben in Gottes Wort eine gewisse Regel / für der Welt gros / für Gott ein grewel / Luc. xvj. Vnd widerumb / für der welt ein fluch / j. Cor. iij. Aber bey Gott in hohen werden vnd ehren / Joan. xij. Müßsen aber auch zuuor mit ihm leiden / ij. Corin: iij. ij. Timo. cap. ij.

Wor



## Worauff ein Prediger beruffen?

**W**An solte ja nu mehr aus Gottes wort so viel gelernet haben/wenn man so gar vnachtsam nicht were/das zweierley Sachen / darumb auch zweierley vnterschiedliche Regiment sind. Etliche/als weltliche Sachen/gehören in die Weltliche regierung / darauff die Weltliche Obrigkeit bestellet ist/dieselbige zu handelen vnd zuverrichten/darinnen man auch schuldig ist/derselbigen nach dem vierden Gebot/vnterthenigen gehorsam / das sich jederman darinnen von derselbigen zur billigkeit weisen lasse / Solches aber sind diese sachen/so das zeitliche belangen/vnd darinnen gelt vnd gut/leib vnd leben/eusserlichen fried vnd eintracht / wie einer bey dem andern rufsam möge behalten/vnd in solchem fried von Christo im Geistlichen Regiment recht vnterrichtet werden i. Timoth. ij. Vnd haben die Prediger solcher verrichtung oder handlung dieser zeitlichen Sachen / ampts halben nichts zuthun / sollen auch der nichts zuthun haben / Wie darumb Christus den jenigen von sich weist / so da vber seinen Bruder vngleicher teilung halben klagt / sagt solche vergleichung oder Erbschiedung der zeitlichen güter / gehöre nicht in seinen Beruff. Luc. xij.

Jedoch wo Obrigkeit oder Vnterthanen in solcher verrichtung oder vnterhandlung/das jenige für nemen/das ihnen zu nachteil irer Seelen Seligkeit / vnd für Gott schedlich were/sind Prediger schuldig/trewlichen beiden teilen einzureden / sie aus Gottes  
 G wort



### Vom Beruff der Prediger.

Wort des besseren zu berichten / damit den künfftigen  
schaden / der armen Seelen für Gott abzuwenden /  
Wie die Propheten / **CHRISTVS** vnd die Apo-  
stel die grossen Könige vñ Heubter gestraffet / wenn  
sie wider die Billigkeit was fürgenommen / Witwen  
vnd Waisen / die Elenden vnd verdruckten nicht zu  
ihrem rechten erfordert.

Etliche Sachen gehören ins Geistliche Regi-  
ment / Welche Christus die Sachen seines Vaters  
nennet / Luc. ij. Daruber Obrigkeit nichts zu gebieten /  
vnd der gehorsam nicht ins vierde Gebot / sondern in  
die Ersten Tafel gehört / als da sind die sachen das  
gewissen belangend für Gott / da man fragt / Was  
für im sünde / Gerechtigkeit / ewige Seligkeit sey etc.  
vnd auff diese Sachen sind die Prediger beruffen vnd  
bestellet / nicht die Obrigkeit / wie itzund gesaget /  
Denn ob wol Obrigkeit vnd Vnterthanen sich auch  
dieser Sachen sollen annehmen für allen dingen /  
Matth: vj. So ist doch die verrichtung dieser Sa-  
chen allein dem Geistlichen Regiment befohlen / das  
es dieselbigen sol entscheiden / darinnen rath vnd Be-  
richt geben / nicht aus vernunfft vnd Menschlichem  
gutdüncken / die verstehen nichts dauon / i. Corinth.  
j. vnd ij. Sondern weil Gott alhie allein Oberster  
Gubernator ist / wie droben gehört / sol darinnen  
nichts anders / denn nach Gottes Wort gehandelt  
werden / Roma. xv. Das dasselbe allermeniglichen /  
on gutdüncken / i. Timoth: iij. vnd ansehen e niger  
Person / Galat. ij. werde lauter vnd rein / on einige  
Corruptelen oder verfelschung / fürgetragen / als  
für



Vom Beruff der Prediger

23.

für Gott in **CHRISTO** / i. Corinth. ij. vnd vierden.

Ist demnach der Prediger nicht darzu beruffen / das er es müste machen / wie es grosse Herren für Rathsam erachten / oder einigem Menschen zu willen oder zugefallen were / i. Thessa. ij. Sondern er ist von Gott auff seinen willen bestellet / vnd darzu erfordert / das ers mache vnd ausrichte nach seinem worte / Also / das wenn Gott darinnen von jemand sagt / Er solle verdammet sein / den sol der Prediger nicht selig sprechen / sondern in warnen / vnd seine verdammis anzeigen / Ezechiel. iij. vnd xxxij. Widerumb aber / wen Gott in seinem wort nicht verdammet / sondern für gerecht vnd selig spricht / den sol der Prediger auch nicht betrüben / Ezech. xij. Vnd also weder aus jm selbst / noch aus anderer Leut gutdüncken etwas handelen / sondern allein gestracks bey dem Wort bleiben / Darumb heist er auch ein Knecht oder Diener Gottes vnd Christi / i. Cor. iij. vnd vj. i. Thessa. ij. So fern sage ich / als ers nach seinem wort vnd willen machet / Wie Paulus spricht / i. Timoth. iij. Wenn du den Brüdern solchs fürhelst / so wirst du ein guter Diener Ihesu Christi sein / So bald der Prediger das wort faren lest / wenn es von allen hohen Heubtern auff Erden / auch von den Engeln aus dem Himmel (wo es möglich were) gerühmet würde / So ist er doch von Gott degradirt / kein Diener Gottes mehr / Dsee. iij. Er vnd solche lere ewig verdammet / Gal. j.

G ij

War ist's



### Vom Beruff der Prediger.

War istz / Prediger werden auch Diener der kirchen genennet / Nicht aber der meinung / das sie es müsten machen / wie es inen die Kirche fürgebe / sondern das ihre dienst von Gott auff die Kirchen bestellet / vnd derselbigen sollen zu nutz reichen / i. Cor. xiiij. ij. Cor. x. vnd xiiij. Darumb setzet Paulus fein darzu / Wir sind ewre Knecht / ja vmb Christus willen / ij. Co. iij. Weil wir denselbigen predigen zu ewer erleuchtung / damit ihr zu heilsamer erkentnis seiner Gnade möget komen / vnd ewig selig werden.

Darumb wo Prediger / nicht als Buttler vnd Stadtknechte / vnserm Herrn Gott vnd dem Euangelio zu spot / sondern als Diener Christi rechtschaffen vnd Christlich von Gottes wegen beruffen werden / da wird inen kein mas noch ziel gesteckt / vnd fürgeschrieben / Sondern werden gestracks allein darauff erfordert / das sie Gottes wort / wie es in kurtze heubtstücke / aus den Prophetischen vnd Apostolischen Schrifften verfasset / in den Symbolis vnd anderen scriptis / so das zeugnis reiner Lere Gottes worts haben / trewlich sollen fürtragen / nach demselbigen alles verrichten / wie inen Gott befohlen vnd aufserlegt hat / auff niemand darinnen sehen / denn allein auff den rechten Bischoff vnd Ertzhirten vnser Seelen. i. Pet. ij. vnd v. Also höret man denn im Prediger / nicht vnser Fürsten / nicht vnserer Herren vnd Oberen meinung / die ist hierin Richter Nullus, vnterstehet sie sich aber / so heist es Rapina Diuinitatis, schreibet vnd beweiset Lutherus / Tom. vij. Jenensi Deutsch / Folio. ccccxxiiij. Sondern man höret den



den fromen Gott in seinem verordneten Diener / vnd in den sachen / so zu vnser Seligkeit gehören / auff die der Prediger von Gott beruffen vnd bestellet ist / nicht die Obrigkeit.

Mögen sich derhalben die Regenten vnd Herrschafften wol fürsehen / die den Zügel wollen zu beiden Wenden / vnd mit vollen feusten führen / Das sie nicht mit ihrer Weltlichen Regierung wollen zu frieden sein / sondern auch die Cantzel vnd Prediger regieren / Die sollen es machen ires gefallens / vnangesehen was Christus darzu saget in seinem Wort oder nicht / Ob es aber derselbige damit vmb sie verdienet / das sie aus seinen Gnaden / wie sie in iren Ehrentiteln rühmen vnd sonst bekennen / in diese hohheit gesetzt / mögen sie bedenccken / vnd darneben betrachten / was das ist / so der weise Man sagt / Cap. vj. Potentes potenter tormenta patientur. Der es geredt / wird nicht liegen / saget die Epistel zu den Ebreern / Cap. vj. Vnd wird darüber kein Krafft noch macht helffen / wie droben auch gehöret.

### Worinnen Summarien der dienst des Predigers vnd sein Ampt stehe?

**D**AS gantze Ampt des Predigers / stehet darinnen / das er die Schlüssel füret des Himelreichs / welche der frome Gott seiner Kirchen gegeben hat / vnd zu ihrem nutz auff Erden verordnet / denn also nennet Christus das Ampt der Prediger /



### Vom Beruf der Prediger.

ger Matt. xvj. Darumb / das es das einige mittel ist /  
dadurch vns in Christo Jesu der Himmel / vnd ewi-  
ge Seligkeit geöffenet wird / Wer diesen dienst vnd  
das wort verachtet / sich desselbigen nicht gebrau-  
chet / der ist verdampt ohn alle hoffnung / vnd im der  
Himmel zugeschlossen / Denn ob wol Christus für  
alle gelitten / vnd allen die Seligkeit durch sein ver-  
dienst erworben / so kan vns doch solches anderst  
nicht nützlich sein / es sey denn / das wirs durch den glau-  
ben im Wort vnd Sacrament auffnehmen / wie Chri-  
stus kurtz vnd rund schlenst / Wer da gleybet vnd ge-  
taufft wird / der wird selig werden / Wer aber nicht  
gleybet / der wird verdammet werden / Mar. xvj. Ist  
aber vnmöglich zu gleyben / ohne das Euangelium  
vnd die mündliche predigt / Wie Paulus spricht / wie  
sollen sie gleyben / von dem sie nichts gehöret / Wie  
sollen sie hören / ohne Prediger? Rom. x. vnd i. Co. iij.  
Diener sind wir / durch die jr seid gleybig worden etc.  
Mag dawider die Welt / von besonderer Gottes  
Krafft vñ gewalt disputiren vnd treumen was sie will  
Dier ist die Krafft Gottes / sagt Paulus / dadurch er se-  
lig machet die daran gleyben / Rom. i. Also hat ers  
nach seinem rath bedacht vnd verordenet / das durch  
vns entstehe die erleuchtung / von der erkenntnis der  
Klarheit Gottes / in dem Angesicht Ihesu Christi /  
ij. Co. iij. Wer derhalben das Wort von sich stößt /  
der stößt die Seligkeit von sich / Act. xij. Danon auch  
droben genung.

Es ist aber die gewalt der Schlüssel zweierley.  
Erstlich die gewalt zu leren / vnd die hochwürdigen  
Sacra



Vom Veruff der Prediger. 25.

Sacramenta zu reichen/nach der Einsetzung Christi/Solche gewalt haben die Peter geheissen/Potestatem ordinis, Christus heists / Clauem scientiae, Den Schlüssel des erkenntnis/Luc.xi. Lutherus heist es den Lehrschlüssel/im Büchlein von den Schlüsseln/wider den Bepflichen misbrauch vnd Diebereye geschrieben/ Tom: v. Jenen: Deutsch fol. cccxix. Vnd hat Christus Luc: xxiiij. sein kurtz gefasset / worauff alle lere vnd predigt in dem theil solle gerichtet sein / Nemlich auff die Busse/das die lere ihre Sünde erkennen/darüber betrübt / vnd derselbigen von Herzen feind werden / abstehen/ vnd der müffig gehen/ Vnd denn auff die vergebung der Sünden / das sie dieselbigen durch den Glauben suchen / bey keinem anderen Namen/denn bey Christo Ihesu / Acto. iij. Der sich im Wort vnd Sacramenten zu vnser Seligkeit mit gnaden wil finden lassen / wie wir denn denselbigen predigen / i. Cor. i. vnd ij. Co: iij. auff ihn getaufft werden / Rom: vi. Gal: iij. Seinen Leib vnd blut im Abendmal gegenwertig haben / essen vnd trincken / Matth: xxvj etc.

Wenn aber one das Gesetz keine sünde ist / Ro: iij. Auch niemand von sünden gründlich weis / was vnd wie gros dieselbige für Gott sey / Rom. vij. Vnd derhalben warhafftiges erkenntnis der Sünden/ aus dem Gesetz allein kömet / Rom: iij. Darzu der handel von Christo vnd seiner Gnad/ein Geheimnis ist von aller Welt vnd vernunfft verborgen / Rom: xvj. vnd i. Cor: ij. Darumb hat Gott sein Wort der zweierley art gegeben / vnd wil haben / das ein Diener Christi



### Vom Beruff der Prediger.

Christi zum Himelreich geleret / beyderley Lehr / Gesetz vnd Euangelium / vnterschiedlich vnd vleissig treibe / altes vnd neues / gleich als ein Hausvater herfür trage / Matth. xiiij. Straffe getrost die Sünde aus dem Gesetz / vnd höre nicht auff / es folge denn bey den Zuhörern ernstliche Busse / hertzliche rewe vnd leid / das man sich von der Sünde wendet / darvon ablest / Ehe denn das geschicht / predige er der keinem von vergebung der Sünden / Weil ohne Busse / kein heil zu hoffen / kein trost zugewarten ist / Luc. xiiij. Jere. v. Vnd Christus nicht wil / one Busse vergebung gepredigt haben / Sondern erstlich / Bus / nachmals vergebung der Sünden / darumb es auch nicht hilfft / wenn gleich ein Prediger den Leuten zu gefallen / wolte die Predigt der Busse ligen lassen / vnd nicht ernstlich oder scharff treiben / wie Gott klerlich spricht: Wenn du Prediger / gleich dem Gottlosen von seiner Sünde nichts sagest / sol er doch seiner sünden halben sterben / Ezech. iij. Allein das sich der Narr solcher Leut ihres Bluts vnd verdammnis teilhaftig machet / wie Gott daselbst spricht / Sein Blut wil ich von deinen Denden foddern / Denn solche Schmeicheler vnd Fuchschwentzer / oder wie sie Ezechiel heist / Cap. xiiij. Schmierer / Tüncher vnd Polstermacher (Christus nennet sie Dieb vnd Mörder) stercken damit die boshafftigen / Wehren / das sie nicht sich bekeren von irem bösen leben / vnd ob sie aber wol viel rühmen / von Gottes gnade / von Christo vnd Seligkeit / Weil aber kein Christus ist / der den vnbusfertigen wolte Sünde vergeben / darumb predigen sie



Vom Beruf der Prediger. 46.

sie lügen vnd nicht das Euangelium / oder Ihesum  
Christum / Also vrtheilet vnd richtet Gott von ihrer  
Predigt vnd erbeit / Jere. xxij. Vnd Jesaias cap. iij.  
Popule meus, qui te beatum dicunt, ipsi te decipiunt.

Ja sprichstu / die Welt kans nicht leiden. Ant-  
wort / So wils aber Gott haben / Lieber auff welchen  
bistu nun von Ampts wegen bestellt vnd beruffen?  
Darzu erfordert es die notdurfft vnd seligkeit der ar-  
men Zuhörer / Wiltu an denen nicht zu einem Ertze-  
dieb vnd Mörder werden / vnd sie mit dir zum Teufel /  
vnter dem schein des falschen Euangelij führen / so  
mußtu sie hie treulich warnen / wie sie Gott warnet /  
Ezech. iij. Thustu das nicht / so suchestu auch wahr-  
lich nicht die Scheslein / sondern die Wollen / ja der  
armen Thierlein Blut vnd schweis. Bistu nun nicht  
ein feiner Dirt vnd Euangelischer Prediger? Wem  
dienest du? Nicht der Kirchen / der Teufel dancke dir  
des diensts / den du jr erzeigest / den wird sie am Jüng-  
sten tage beweinen vnd beklagen / So dienest du auch  
nicht Christo / Nat zu / wem denn? Paulus sagts / du  
dienest dem / auff den du es gesatzt hast / Nemlich dei-  
nem leidigen verfluchten Bauch / Rom. xvj. Den ha-  
stu lieber denn Christum / vnd die Kirchen / das wird  
dir vnser DLRK Gott abnemen / wenn du vnd dei-  
nes gleichen werdet den hören / den jr itzund verlachtet  
in ewren Hertzen / das er sagen wird für dem vmb-  
reis der Erden / an jenem tag / Nunquam noui vos,  
discedite à me &c. Math. 7.

Du kans ja das wol gedenccken / wenn die welt  
diese form vnd art der Lere nicht kan dulden vnd leis-  
den



### Vom Beruff der Prediger.

den/wie sie Christus fürgeschrieben in seinem wort/  
vnd daran keinen Tittel noch Buchstaben wil geendert haben/Matth.v. So ist kein zweiffel / das sie Christum / das Euangelium vnd die gesunde Lere nicht mehr leiden kan / Wie Paulus zuuor gesaget/ das die Welt in dieser letzten zeit thun werde/ ij. Tim: iij. Ist nu die frage / ob damit Gott gleichwol gezwungen/eben diese leute/dennoch der art selig zu machen/wie sie es zu predigen für ratsam ihres gutdünkens ansehen/durch Vngesunde / das ist verfluchte Lehr/Wie Paulus spricht / Wenn auch ein Engel vom Himel ein ander Euangelium prediget/ so sey er verflucht/ Gal:j.

Wenn aber durch das Gesetz/die bus gepredigt/ so sol folgen die Lere des heiligen Euangelij/ Das man die Betrübten erschrockenen hertzen damit/vnd also aus rechten grunde/widerumb tröste/ das man sie berichte / nicht wie sie fortan in Sünden bleiben/ sondern derselbigen für Gott mögen ledig vnd los werden/ Das geschicht in keiner andern art vnd weise/denn durch Christum/ der vnser sünde getragen / an vnser stet für Gott getretten / vnd die vnmesliche straff der Sünden/welche ist Gottes zorn/ der ewige fluch vnd bittere tod/lassen vber sich ergehen/ damit er für vns bezalet/auff das wir friede hetten / Jesai: liij. Rom:vij:etc. Wird also derhalben vns die schuld vnd pein erlassen / nicht das schuld ohne pein künde vergeben werden / sondern das sie bezalet vnd vergnügt ist/in der Person Christi/Welcher das schuldopffer worden ist für vns / Jun Römern am dritten/  
zum



Vom Beruff der Prediger. 27.

zun Ephesern am fünfften / zun Ebreern am zehenden. Wer nun sein vertrauen setzet an den Son / den wil vnd sol er nicht vrteilen / oder handelen nach seiner würdigkeit / Sondern von seinen sünden selig machen / Matthei am ersten / vnd Joannis am dritten. Wie denn auch der glaube Christum darumb suchet / Nicht das er in sünden möchte bleiben / das schicket sich mit seinem tode nicht / sagt Paulus / zun Römern am sechsten / Vnd ist contrarium in adiecto, wie man es in den Schulen heist / Qui de priori peccato habere veniam desiderat, spricht Augustinus / nullo modo augmentare aliud præparat. Darumb / die keiner sünden halben bekümmert / nicht wünschen oder begeren der los zu werden / die haben gewislich keinen Glauben / darumb auch keine Seligkeit.

Das ist die forma doctrinae gesunde / rechte / reine lere / zu einem theil / so viel die potestatem ordinis, vnd den Lehrschlüssel belanget / Wie derselbige sol gefüret werden / wo er das Himmelreich schliessen vnd öffnen sol / wie hernach folgen wird / Derselbige Lehrschlüssel gebraucht nu neben dem mündlichen wort / auch der eusserlichen sichtbarlichen werck / wie sie Christus eingesetzet / vnd ins Wort gefasset hat / vnd gleich das wort damit vnter augen gefüret / vnd sichtlich gemacht / in den hochwürdigen Sacramenten / Nicht das dieselbigen allein solten warzeichen sein / eines abwesenden dinges / Sondern das Gott / der da reich ist von Barmhertzigkeit / auch durch dieselbigen unsere seligkeit wircken wil / wie Christus sagt / Wir werden durch das Wasser vnd heiligen Geist

D ij

wider



### Vom Beruff der Prediger.

wider von newen geboren/ Joan. iij. Dadurch gerei-  
niget vnd selig gemacht/ Ephes. v. ad Tit. iij. vnd i. Pet.  
iij. Nicht als außser Christo/ wie die Rotten schwe-  
men/ sondern wie droben gehört/ das wir auff Chris-  
tum / seinen Tod vnd Auferstehung getaufft sind/  
Rom. vi. vnd Pet. iij. Denselbigen in der Tauffe ha-  
ben angezogen/ Gal. iij. Das sey vom ersten Teil der  
Schlüssel vnd Ampt der Prediger.

Das ander teil der Schlüssel / ist die Jurisdictio-  
on, die macht vnd gewalt zu binden vnd zu lösen. Lu-  
therus heist diese die Bindeschlüssel/ vnd Löseschlüs-  
sel. Denn vnser Ampt ist damit nicht ausgerichtet /  
das wir allein mit rechtschaffenem lere der Bus  
vnd vergebung der Sünden/ allen vleis trewlich an-  
wenden/ die Leut darnon recht berichten/ was Sün-  
de / wie sie darumb verdammet sind / wer Christus/  
vnd wie sie durch den selig sind/ Sondern bey vnd ne-  
ben der Lere / hat auch Gott vns Predigern die trewe  
huet auferleget/ das wir sollen vleissige wechter sein/  
Jesa. liij. vnd lvj. Ezech. iij. Jere. vi. acht haben auff  
vns selbest/ vñ die gantze Herde/ Act. xx. Wie sich ein  
jeder zu derselbigen lere der Bus vnd vergebung der  
Sünden schicket/ dieselbigen annemet/ oder nicht an-  
niemet / vnd sollen wir es nicht lassen vnachtsam  
durch einander gehen / nicht darnach fragen / wer  
sich zu der Lere recht schicke oder nicht/ Sondern gar  
vleissigen vnterscheid halten/ wie Gott spricht/ Jere.  
xv. Wirstu das köstliche vom schnöden scheiden/ sol-  
tu wie mein Mund sein/ vnd Paulus i. Cor. v. Thut  
von euch hinans wer da böß ist.

Dar



Vom Beruf der Prediger. 28.

Darumb welche die Predigt auffnehmen / das ist / nach der Buspredigt / Busse thun / sich irer Sünde haiben gern lassen berichten vnd straffen / aus dem Gesetz / darnach dem Euangelio glauben / oder doch ja von Hertzen gerne wolten glauben / suchen Christum zu vergebung irer Sünden / das sie derselbigen mögen los sein vnd ledig werden / Brauchen derhalben die hochwürdigen Sacramenta / Diese sol der Prediger lösen ihnen den frölichen trost fürsagen / das sie rechte Christen / warhafftig Gottes Kinder vnd erben sind der ewigen Seligkeit / Vnd ob wol zu weilen schwachheit mit vnterleufft / wil sie aber immer sich straffen vnd weisen lassen / sol er mit ihnen gedult haben / inen neben der Lere förder helffen / mit Absolution / vnd reichung der heiligen Sacramenta / nach der Einsatzung Christi.

Welche aber der Predigt des Gesetzes / vnser Lehre vnd vermanung aus Gottes wort / nicht achten / wollen derhalben vngestraft sein / keine Busse thun / ist inen auch bey irer Sünde nicht leid / ja dürffen sie noch wol rhümen / derselbigen ir gespöt haben / Jer: xj. Welches ein recht Sodomitisch stücklein ist / Jesa: iij. Fragen nach keine Sacrament / oder brauchen des selbigen one Busse vnd besserung / darumb auch one rechten glauben / welcher Christum darumb sucht / das er durch ihn möge von der Sünde los werden / wie gehöret / oder nach dem sie eine zeitlang sich recht gehalten / fallen sie widerumb in grobe sünde vnd laster / wollen ferner nicht gehorchen / Luthe: Tom. v. Jenen: fol. cxxiiij. vnd Tom. vj. folio ccccvi. Solche  
D iij sol



### Vom Beruff der Prediger.

sol der Prediger binden / inen verkündigen vnd ansagen / nicht das sie irer sünde halben verdammet sind / das gehöret droben in die Predigt des Gesetzes / schreibet Lutherus ad Noribergenses, Com. vij. Jenen: fol. cccl. Sondern weil sie inen auch durch die Predigt nicht wollen raten lassen / keine vermanung an inen hilfft / Sol man denen sagen / das aller trost / den sonst noch die armen Sünder haben im Euangelio / an ihnen verloren / sie keine Christen sondern vnchristen / vnd allerding Heiden sind / Matth. xvi. Vnd ob sie denn gleich in irer vnbusfertigkeit sich wolten absolviren lassen / das Sacrament holen / Weil sie aber also wider Gottes wort vergebung suchen / ohne Bus vnd Glauben / Sol man darzu sie nicht gestatten / die edele Perlen nicht für die Sew werffen / vnd das Heiligthumb für die Dunde / das wil Gott nicht haben / Matth. vij.

Das ist vnser Göttliche Censura / vnd rechte ware excommunication, Wie Lutherus an die Prediger zu Womburg in Wessen schreibet / welche einen jedern Diener des Worts / so darinnen arbeiten nach Gottes Wort / Er sey Caplan / Pfarherr oder Superattendens / zu gleich von Christo mit dem Ampt befohlen ist.

Was nu der Prediger darinnen der gestalt / nach Gottes Wort vnd willen handelt / das ist als von Gott selbest gehandelt / vnd krefftig im Himmel / Schlenst er dir nach gethaner bus vnd Glauben den Himmel auff / vnd löset dich / Wie er in dem fall in alle wege lösen / vnd mit nichte binden sol / so bistu gewislich



wislich los / vnd stehet dir der Himmel offen / solt  
 dich auch mit freuden rühmen / du seyst ein Christ  
 vnd Kind Gottes / Schleust er aber zu / vnd bindet  
 dich / der vrsach sage ich / das du keine Busse thust /  
 nicht gleubest / dem wort nicht gehorsam bist / Wie  
 er denn in dem fall binden sol / vnd mit nichten lösen /  
 so bistu warhafftig im Himmel durch Gottes vrteil  
 vnd gerichte gebunden / von der Christenheit ausges  
 setzt / vñ ein kind des verderbens / wie Christus spricht  
 Matth: xvj. vnd xvij. Was jr auff Erden binden wer  
 det / sol auch im Himmel gebunden sein / vnd was jr  
 auff Erden lösen werdet / sol auch im Himmel los  
 sein / vnd Joan. xx. Nemet hin den heiligen Geist /  
 welchen ihr die Sünde erlasset / den sind sie erlassen /  
 vnd welchen ihr sie behaltet / den sind sie behalten /  
 Das Wort wird den Erdboden richten / Joan. xij.

Sprichstu / Wie wenn mich denn der Prediger  
 nicht wolte lösen / ob ich gleich warhafftige bus vnd  
 Glauben hette / nach Gottes wort / müst ich darumb  
 auch im Himmel gebunden vnd nicht gelöst sein?  
 Antwort / Weil hier der Prediger sein Ampt fahren  
 lest / das er nicht handelt nach Gottes Wort / als ein  
 Diener Christi / So kan er dich auch nicht binden /  
 weil das Binden nicht seiner Person on Ampt / son  
 dern dem Ampt in seiner Person gehöret / Gleich wie  
 widerumb auch das nicht löset / ob der Prediger ein  
 grundschalck were / vnd dir / einem vnbusfertigen  
 Menschen / wolte das Sacrament reichen / Absolu  
 tion sprechen / Die heists / wie der Prophet saget /  
 Adprehendit ebria sitientem, vnd **CH** Iustus / Ein  
 Blind



### Vom Veruff der Prediger.

Blinder füret den andern/denn du des heiligen hoch  
würdigen Sacraments nicht allein keinen nutz vnd  
fromen hast / sondern machest dich vber alle andere  
deine sünde schuldig / an dem vnschuldigen tod deis  
nes fromen Erlösers Jesu Christi/vnd issest dir selbst  
Gottes schweres Gerichte/ i. Cor. xj. Gebrauchest al  
lein der edelen tewren Güter Christi / zu deinem Del  
keplein / dich darunter für einen Christen zu putzen  
vnd auszugebē/das heist den Namen Gottes schend  
lich misbrauchen/wider das Ander Gebot / das wil  
Gott an dir richten vnd rechen/Exod:xx. Viel gewa  
licher / denn er an der Sodommer Land gethan hat/  
Matth. xj. Were derhalben dir viel besser/das du dein  
lebenlang vom Euangelio nie nichts hettest gehört/  
ij. Pet. ij. Denn der Knecht viel mehr schlege leiden  
mus/der seines Herren willen gewust/vnd nicht ge  
than/den der es nicht gethan/weil ers nicht gewust/  
Luc. xij.

Sehen derhalben beide/ Prediger vnd Zuhörer  
wol zu/Diese das sie sich nach der lere Gottes worts  
recht schicken/Jene aber/das sie in ihrem Ampt nie  
monds verseumen/sondern dasselbe recht füren/ aus  
ser dem / wollen gute gedancken vnd hoffnung kein  
teil für Gott helffen / Denn also würde kein Mensch  
verdammnet/vnd were eine Religion so gut als die an  
dere/weil ein jeder bey der seinen / gute gedancken vnd  
hoffnung / keiner aber den willen hat / das er wolle  
verdammnet sein/Es heist aber wie Paulus sagt / wie  
viel nach dieser Regel ( nach dieser Regel spricht er )  
einher gehen/vber dieselbigen sey fried vnd Barmher  
tzigkeit/etc. Gal. vj. Für



Vom Veruff der Prediger. 30.

Fürnemlich aber gebrauche ein Prediger dieser beider Gewalt weidelichen / wider die jenigen / so da falsche Lere einfüren / Vnd wisse / das Gott sonderlichen im aufferleget / auff dieselbigen ein vleissig ange zu haben / Jesai:liiij. Ioan x. Wo derhalben er vernie- met / das offentliche falsche Lere fürhanden / Da schweig er bey leibe nicht / Sondern zeige den Irr- thumb aus Gottes Wort an / straffe denselbigen mit allem ernste / ij. Timoth. ij. vnd ad Tit: j. Las im den mund hierinnen nicht stopffen / Psalm. xl. Weiche kei- ne stunde nicht / Gal:ij. Auch den jenigē / die gleich für- der zeit / viel guts vnd grosse thaten in der Kirchen ge- than / Matth. vij. Lasse sich auch damit nicht stillen / das etliche vntrewlich die Irthumb extenuiren / vnd gering schetzig machen / Sondern behalte dagegen die treuwarnung des heiligen Geists / das auch ein wenig Saurteigs / den gantzen teig verseuret / Gal:v. Wenn nur ein tropffen oder vier / tödliches gifftes / in eine Kandel köstliches guten Malfasiers gegossen wird / So ist es nicht mehr der gesunde tranck / Also ist es nicht mehr die rechte reine heilsame Lehr / wenn sie durch einen Irthumb verfelfchet ist. Liese Lutherum / Tom: viij. Jenen: fol. clxcix. Im kurtzen Bekenntnis vom Heiligen Sacrament.

So entschuldigt auch das nicht / ob man schrei- en wolte / es weren allein incommodæ locutiones, man verstehe es nicht recht / Antwort / Man sol beide recht Leren vnd recht reden / ij. Timoth: j. Darumb ist die schuld hierinnen nicht des / der da vber Schwermerey ruffet / Sondern der die sachen verdecktig gemacht /  
J mit



### Vom Beruff der Prediger.

mit frembber stim vnd art zu reden / welche man in  
der Kirchen nicht leiden / dafür jederman warnen /  
Solche Personen / wo kein Vermanen an ihnen zur  
Bus stad hat / als reiffende Wölff / Dieb vnd Mörd  
der meniglichen fliehen sol / Das wil Christus / Rex,  
Regum & Dominus Dominantium, Mein vnd dein  
Weiland / Printz vnd Gubernator der Kirchen also  
haben / Matth. vii. Ioan. x. Rom. xvj. ad Tit. iij. Wer  
also die frembde stim nicht fleucht / achtet er für seiner  
Schefflin keines / Ioan. x. Die Prediger aber so dar  
zu schweigen / vnd nicht wehren / helt Er für keine  
rechtshaffene gute Hirten / Sondern für Miedling /  
denen es vmb den Bauch zu thun / Darumb auch  
Christi Diener nicht sind / Rom xvj. Denn Lehren  
vnd Wehren / saget Lutherus / gehöret beides zu vnser  
rem Ampt.

### Wie vnd warumb ein Pfarherr wi derumb zu entsetzen vnd was der Proceß sey?

**D**ie Prediger die nun der gestalt zu irem Ampt  
komen / vnd dasselbige darinnen ausrichten /  
so inen befohlen / Der Art vnd Massen / wie  
Gott haben wil / vnd itzund aus Gottes wort ist an  
gezeiget / Dieselbigen wil Gott geehret haben / Nicht  
schlecht wie Vater vnd Mutter / Weltliche Oberkeit  
vnd Herrschafften / Sondern wie er durch Paulum  
klerlich anzeiget / Zwifacher ehren sol man sie werd  
halten / i. Tim. v. vnd i. Thes. v. Erkennet die an euch er  
beiten /



beiten/vnd euch fürstehen in dem HErrn/vnd euch  
vermanen/Dabt sie deste lieber vmb jres wercks wil-  
len/vnd seid friedsam mit jnen/ Das ist/ Wie es Lu-  
therus am Rande fein auslegt / Beleidiget sie nicht/  
Urtheilet vnd Murret nicht wider sie/ Weistert noch v-  
berklügelt sie nicht/ Auff das sie jr Ampt / darinnen  
sie vber ewre Seelen wachen / Als die dafür müssen  
Rechenschafft geben/mit Freuden mögen füren/vnd  
nicht mit Senffitzen/Denn das ist euch nicht gut/sa-  
get die Epistel zu den Ebreern/am dreizehenden Capi-  
tel. Summa/ sie sind Legaten vnd Botschafften an  
Gottes stadt/in sachen / Nicht zeitliches Gut/ Son-  
dern die ewige versöning vnd Seligkeit belangend/  
ij. Cor.v. Vnd darümb dem lieben Gott mehr gelegen  
an einen fromen trewen Pfarhern / weder an aller  
Obrigkeit in der gantzen Welt / Weil derselbigen  
Ampt jm nicht dienet zu seinem Himelreich/wie das  
Pfarrampt thut/schreibet vnd vrtheilet Lutherus/Co:  
viii. Jenen:fol.189. Wer derhalben jm dieselbigen sei-  
ne Legaten betrübet vnd verachtet / der verachtet in  
selber/Luc.x. Vnd widerümb/was derselbigen einem/  
auff Erden Trosts vnd Guts widerfaren von den fro-  
men Christen/ Das wil Christus zum Jüngsten ta-  
ge/ für dem Umbkreis der Erden rhümen / für aller  
Welt/ Das es jm selbest zu Ehren vnd gut geschehen  
sey/Matth.xxv.

Darümb sehen sich frome Hertzen wol für /  
Dis ist der Sententz des zukünfftigen Jüngsten  
Gerichts/den hat dir vnd mir Gott vnser Schöpffer



### Vom Beruff der Prediger.

vom Himmel/durch keinen Engel noch Mundboten/  
sondern eben durch seinen einigen Son/vnsern Erlö-  
ser vnd zukünfftigen Richter / Joannis am fünfften.  
Auffer welchem kein Gott noch Erlösung (Mercke  
darauff)nimmerniehr zu hoffen ist/Ephe:ij.laffen an  
sagen vnd ankündigen / das er nach diesem seinem  
Sententz/vnd mit nichten nach der Welt gedancken  
noch vrteil/Richten werde. Darumb das jenige nie-  
mands helffen wird / so itzund zum gemeinen schein  
vnd operculo/vberaus treflich allenthalben wird für  
gewand vnd gerhümet / Das man ja Gottes Wort  
vnd dem Euangelio von Hertzen günstig / ob wir  
wol der Personen allen schabernack anlegē/Das sind  
die rechten grossen inwendigen heimliche Feinde des  
Euangelij(schreibet Lutherus an eine Fürstliche Per-  
sone) Die sich rhümen grosse Liebhaber des Worts/  
vnd doch den Personen/die es führen müssen/ von her-  
tzen feind sind/Welches ein sehr grober / tölpischer/  
doch schedlicher grif ist/das liebe Euangelium durch  
viel vnd hoch rhümen/zu grunde zu tilgen / Com.vij.  
Jenen:fol.cccxvij. Darumb wie gesagt/ sehen sich  
frome Christen wol für/ das sie nicht alleine der feind-  
de keine selbst sein / die mit solchem Judas kuss das  
Euangelium verraten / Sondern auch mit solchem  
Unrecht jr gewissen nicht beschweren/vmbs Teufels  
willen/vnd mit dem anderen zum Teufel faren / wo  
sie jr fürnemen bewilligen / Lutherus Com: viij. Je-  
nen:fol.cxxxix. Denn Nehler vnd Steler ist einer für  
Gott wie der ander/Psalm.l. Videbas furem, & curre-  
bas cum illo, vnd Roma. j. Nicht allein die solches  
thun/



Vom Beruff der Prediger.

32.

thun/sind des Todes würdig/ sondern auch die/so gefallen haben an denen die es thnn.

Lieber Gott/ Wie istis so ein grausam/greulich vntreglich Laster/den leiblichen Eltern vnd Weltlicher Oberkeit / vnehr vnd vndanck erzeigen/Da sie Gott wil dargegen gefürcht vnd geehret haben/Dne zweiffel so mus es dargegen zwifaches Laster sein / Wo man Prediger vnehret/ weil sie Gottes vrteil zwifacher ehre würdig vnd wert achtet / Vnd würde kein vernünfftiger Mensch/ oder ehrliebender biderman/ one schmerzen vnd jammer sehen können/Wenn vngeratene/Gottes vergessene Kinder / ihren leiplichen Vater vnd Mutter / bey den Thoren vber die Haus-schwellen/anff die gassen in den Dreck zögen / oder auffrührische Buben / frome Obrigkeit vom Rathhaus auff's Pflaster stürtzetten/da sie gleich etwas ein wenig/auch gleich zu viel versehen hetten / Wie viel/ (Ich rede auff vnser gewissen für Gott) greulicher ist aber das Laster/Wenn Pfarkinder/vom bösen Geist getrieben/schreibet Lutherus Tom.v.fol.cccxviij. Ihren Geistlichen Seeluater/ durch den sie das Himelreich/zeitlich vnd ewige Seligkeit haben / von dem auch jr Mund vnd Hertze zeuget/Er sey reiner Lere vnd lebens/von sich ins elende stossen/ Daran nicht zu frieden sind/werffen mit bösen Karten / vnd Dreck hernacher/das man doch einem zu recht beklagten/vberweisten Diebe/nicht thut/Sondern wenn derselbige gehengt/lest man in ferner am Galgen vnbetrübet etc.

Wo denn Solchs gleich fürgenommen würde/

J iij

Ab



### Vom Beruff der Prediger.

Al so hüte sich / wie gesagt / ein jeder fromer Christ / das ers jm ja nicht lasse gefallen / viel weniger darein verwillige / Rath vnd That darzu gebe / Wo man in gleich darzu mit zeitlicher gewalt nötigen wolte / Für allen dingen schreibet Lutherus / Must ihr euch nicht lassen dringen / das jr die Priester verjagt / Vnd wo gleich Hertzog N. gebieten wolt / den Pfarherren zu verjagen / sol man sich nicht begeben / solcher seiner Tyranny executores / vnd also theilhaftig seiner vn- tugend zu sein / Tom. iij. Jenen: fol. cccxxvi. vnd fol. cccxxvij. Würde aber solchs durch Hertzog N. für- genommen / das er zwingen wolte zu exequiren solch gebot / Da müssen sie jm schlecht gehorsam absagen / Denn sie köndten es mit Gott nicht thun. Also auch Tom. v. fol. ccclxi. Ir solt nicht loben noch preisen / o- der verwilligen in jr schendliche Missethat vnd bos- heit etc.

Ja sprichstu / So mus man euch Herrichen nun kein böß wort sagen / Eweres willens lassen bez- zehmen / niemand nicht einreden / Sondern wie jhrs machet / es sey wie gut oder böß es jmer kan / euch dar- zu / Gnad Herr vnd Juncker heissen / dennoch auff den Henden tragen / vnd als vnser Obern vnd Sem- per freyen gewehren lassen. Antwort / das sol nie- mand / denn der vnuerschampte leidige Teufel bege- ren / Wie er auch im Bapst gar redlich gethan / vnd es also haben wollen / Wenn man gleich vernam / das er viel tausent Seelen mit jm / in abgrund der Hel- len fürete / das jm niemands durffte einreden / Noch fragen / Juncker Bapst was macht jr? Distinc: xl.  
Si



Vom Beruf der Prediger. 33.

Si papa &c. Solhem vnd dergleichen Lester Teufel  
sollen wir nun vnd nimmermehr diese vn selige Tyrani  
ney widerumb einreimen / Sondern vns darwider  
mit aller freudigkeit setzen / Demnach darauff vleis  
sig achtung geben / was vnser Prediger handelen /  
leren vnd fůrnemen. Vnd ist das nicht allein die  
macht / die Gott den Zuhörern gegeben / Sondern ist  
auch sein Wort vnd ernster Befehl / das wir vns sol  
len für den reissenden Wolffen hüten / Darumb zuse  
hen / wenn vnser Prediger als ein Trewer Dirt vnd  
Diener Christi / oder als ein Wolff handelet / Mat  
thei am siebenden / Vnd in der ersten / Johannis am  
vierden. Prüfet die Geister / ob sie aus Gott sind.

Vnd was wollen wir viel sagen ? Christus der  
Ertzhiert / so die warheit selbest / vnd nimmermehr  
feilen noch liegen kan / der giebet es freywillig / auch  
seinen greulichsten Feinden in ire macht / Da in der  
selbigen einer / einiger Sünde / das ers nicht gemacht  
in seinem Ampt / nach Gottes Wort vnd willen /  
(Das heist Sünde / Nicht was mir oder dir / vnd ei  
nem anderen Girrenkopff nicht gefelt / das verstehest  
du ja wol) kōndte vberweisen vnd vberführen / Das der  
selbige freymütig herfür / vnd im vnter augen trete /  
Dasselbige beweise vnd darthue / Johannis am ach  
ten. Wie viel mehr soles ein gemeiner Prediger lei  
den / vnd darzu bereit sein / einem jedern / der Lere vnd  
Glaubens / so er fůrtreget / in seinem Ampt / Wo man  
es fordert / Rechenschafft zu geben / in der Ersten / Pe  
tri am dritten.

Darumb



### Vom Veruff der Prediger.

Darumb sehe die Kirche darinnen nür vleissig vnd wol zu/vnd haben sonderlichen die Obrigkeit darauf gut achtung/was man leret vnd für hat / Denn das dieselbige fürnemlich macht hab/Ampts halber dar auff zu sehen / beweisen die herrlichen Exempla der löblichen fromen Könige im Alten Testament/Welche die rechtschaffenen fromen vnd trewen Lerer/zu irem Ampt befördert/die falschen abgeschafft/Welches Gott one zweiffel/an jnen nicht als einen rechtschaffenen angenehmen Gottesdienst/würde gerühmet haben/in seinem Buch der heiligen Bibel/wenn es nicht zu irem Stand vnd Ampt gehörete. Sie sind ja Nutritij Ecclesiae, Jes. xlix. Darumb sollen vñ müssen sie vnterschiedlich wissen vnd zu forschen macht haben/Wo die rechte Kirche / darumb welches die rechte lere/on welche die Kirche nicht sein kan. Wenn denn kein giftiger Wurm vnter der Soñen / denn ein Prediger / Der in seinem Ampt vntrewlich vnd vnrecht handelt vnd leret / Darumb sol Obrigkeit sich nichts schrecken lassen/sondern hie getrost vnd vleissig zusehen / ire dienste dem lieben Gott von Himel/vnd der armen Kirchen/deren Seugammen sie sind/erzeigen/Solchen wunderlichen leuten auff die hauben greiffen/vnd dieselbigen abschaffen /wie dort die fromen König die falschen Propheten abgeschafft haben.

Ich achte das man hie viel zeugnis der Schrift solte füren/vnd darvon ein besonder Buch von etlichen bogen schreiben/sey der arbeit vnd Papirs nicht wert/Denn es so klar in der heiligen Schrift/das es keinen



Keinen Streit hat / Darzu jederman one beschwer gar leichtlich vnd gern gleubet. Aber lieber Gott erbarmis / Wenig wenig dasselbige zu rechter gebürlicher mas ausrichten / Viel aber vnd vber viel / eben wie der Papst darinnen handelen / Das ohne zweiffel der Papst Teufel sie gantz vnd gar eingenomen vnd besessen hat / Faren vnter diesem Schein / mit lauter gewalt / Setzen Pfarherrn ab / Andere widerumb auff / ires gefallen / das ein armer Man solte fragen dörrffen. Lieben Herrn warumb thut jr doch das? Vnser Pfarherr ist der Lere vnd Lebens rein / das bekennet jr selbest / Darzu ein Fromer / Gottseliger / Eysferiger vnd Trewer Hirt / wie ihn Gott haben wil / Ey warumb nemet jr vns denn diese Edele / hohe / thewre vnd werde Gabe Gottes / die vns / Nicht jr / Sondern **JESVS** Christus erworben vnd gegeben hat / Ephe. iij. Ja frage darnach / vñ entlauff nicht / Trotz der darumb bekümmert were / Sein wehe klagete / vnd was sage ich? Die sol vnd mus alle Welt nicht allein ferner nicht fragen / Sondern auch solche Sachen vnd Sacrilegium / Wie es Lutherus heist / Co: v. Jenen. fol. ccclix. ein jeder im Kurtzumb lassen gefallen / dasselbige rhümen / Wer das thut / Ey / der ist ein Lieber / Getrewer / gehorsamer Vnterthan / Wer nicht: Der stinckt von Auffrur / Des er sein lebelang nie in den Sinn genomen / Mus herdurch vnd wider herdurch / Vnd dennoch ist solche Gewalt auch nicht vnrecht.

Ich frage / Bescheide mich vmb Gottes willen /

K

len /



### Vom Beruff der Prediger.

len. Was ist zwischen diesem Teufel vnd des Papsts Teufel für ein vnterscheid?

Sprichstu abermals / Man saget aber gleichwol von dem vnd jenem Prediger / gar viel böses / Solte man denn vmb böser Sachen willen einen Prediger nicht zuentsetzen haben / Woher habt jr die Priuilegia? Antwort. Wenn man es denn gleich nicht allein sagte / Sondern auch schriebe / druckete / mahlete / schnitzte / sünge / lachete / köckte vnd spye alle winkel vol / Was ist der Sachen damit gehölffen? Was sagen offft vngeratene böse Kinder von ihren Eltern nicht / vnd vntrewe Vnterthanen / Fürnemlich Dieb vnd Schelcke / von der lieben Obrigkeit? Ist doch war / Das die Welt das Liecht hasset / saget Christus Johannis am dritten. Sol man darumb alle Liechter in die Erden treten / vnd in ewiger Finsternis sitzen? Freylich ist die Welt dem Liecht feind / Nicht das das Liecht so Böse were / sondern es wil die Bösen wercke offenbaren / Gleich wie der Dieb der lieben Obrigkeit / allen Redern vnd Galgen feind ist / Nicht das sie böse weren / sondern sie wollen jm sein stelen / vnd strassen schinden weren / Sonst fragt er nicht dar nach / Das alle strassen voller Galgen / vnd alle Galgen voller Dieb hiengen / so het er dester mehr zu stellen / wenn nur die Obrigkeit in zu friede liessen / vnd seinem fürhaben nach / die Kisten vnd Beutel lausen / Weil sie aber darüber hengen / Wanne wie mus sie hören / von Tyrannney / vnd das sie Blutgierig sey / Sol man denn darumb Obrigkeit auch verjagen?

Ja



Ja Obrigkeit sitzet in Gottes Ampt. Antwort/  
 Eben so wol der Prediger auch / Wil dismal mehr  
 nicht sagen / Vnd ist dis das alte Tranckgelt / das die  
 Welt allen trewen Dienern / ja irem liebsten Heiland  
 Ihesu Christo selbest verehret / Der mus vnter dem  
 Tittel vnd schendlichen Namen den Geist auffgeben /  
 Das er erger / denn kein Auffhürer vnd Mörder /  
 dem Römischen Keiser nach der Kronen gestanden /  
 Das weistu ja wol: Also mus Elias hören / das ihm  
 kein geringer Man / sondern ein gewaltiger grosser  
 König sein rund vnter die Nasen saget / Er richte in  
 vngheorsam vnd Auffhür an bey seinen Vnterthanen /  
 ij. Reg. xvij. Mus aber die wort weidelichen wider  
 umb in seinen Rachen fressen. Vnd ist der Namen  
 so gemein gewesen / das in zu letzt auch die Deuchel-  
 pfaffen / wider die rechten Propheten trieben. Amos.  
 vij. Paulus darüber an dem Branger vnd Rack weidelichen  
 gesteupe vnd vbel tractirt wird / Acto: xvj.  
 vnd xvij. Wolan so wollen wir getrost / Christum /  
 Propheten vnd Apostel verdammen / vnd sagen / inen  
 ist allen recht geschehen. Was saget aber mein vnd  
 dein Gott darzu: Sihe / das saget Er / Prouerbiorum  
 am siebenzehenden. Wer den Gottlosen recht spricht /  
 Vnd den Gerechten verdammet / die sind beide dem  
 HERRN ein Grewel / Vnd Jesaia am fünfften.  
 Wehe denen / die Böses gut / vnd Gutes Böse heissen /  
 etc.

Dennoch sprichstu / sind mit solchen Exempeln  
 der Fromen vnd vnschuldigen / die Schuldigen nicht  
 vnschuldig gemacht. Antwort / Das ist auch war /



Vom Beruff der Prediger.

vnd darumb den falschen Richtern Susanne nicht vnrecht geschehen/ob wol Naboth vnrecht ist gesteiniget worden/ iij. Reg. xxj. Es ist auch noch mehr war/ Das eben vnter vns/ die wir vns Euangelische Prediger rühmen/ vnd sein sollen/ Leider viel wunderliche/ seltsame/ grund böse Köpffe sind/ die wirs gar offft nicht gut machen / vnd also Haus halten / das es Gottim Himmel erbarm/ Siehet die Obrigkeit vnd Kirche vbel zu/ lest vns frey den Zügel zu vnserm willen/ wie grob wirs offft wider Gottes Wort machen/ Die Kirchen betrüben / Fried vnd Einigkeit zerreißen/ Durch Newe Opinions vnd fürwitzige Lere/ leben vnd handelen/ das eine schande ist/ Die gedencet niemand/ das es möchte geendert vnd gebessert werden/ ja habens viel jr lust vnd gefallen/ Das zubesorgen / Gott werde ein mal auffwachen / vnd darein schmeissen/ Das weder von Predigern / Kirchen/ Obrigkeit vnd Vnterthanen kein Splitter mehr bleiben wird. Ist aber nun widerumb meine Frage / Sind denn vmb solcher bösen/ wunderlichen / vngeschickten Köpff willen/ die Rechtschaffenen Prediger auch für vntüchtige/ wunderliche Köpffe zu schelten? Vnd darumb alles war/ was man böses von den Predigern saget / weil es etwa in etlichen die warheit ist/ Ich halt dafür / du wirst auch Nein darzu sagen. Weil denn offft viel gesagt / gemeiniglich aber erlogen ist/ vnd doch wol zu zeiten das Gemeine gerüchte mit eintrifft/ Wie das Sprichwort lautet / Quod communis fama famat, non de toto perit, So kommen wir nun auff den Neub:grund / wie man sich denn darin:





darinnen recht Christlich halten möchte / damit wir  
vnsere Seele verwaren.

Hierauff ist mein Antwort/aus Gottes Wort.  
Wenn du was böses liesest oder hörest / von einem  
Prediger/vnd das er darüber seines Ampts entsetzet/  
oder verjagt vnd betrübet sey / Lieber frage bald/ Ist  
der Mann dieser stück fürhin zu Recht aus Gottes  
wort/nach beschehener Klag vñ antwort/ Rede vnd  
Widerrede / vberweist vnd vberfüret? Ist das nicht  
geschehen/ So lass schreiben vnd schreien/gros oder  
klein/viel oder wenig/Freund oder feind/wer da wil /  
sagt Paulus/Nim du die Klag nicht an/ Das hörestu  
wol/von Gottes wegen/der wils nicht haben/.i.Tim:  
v.Die Person sol mit Zeugen vberfüret werde/ Nicht  
nach der Execution / das man nach dem Rechten  
wolte fragen/wenn der arme Dieb gehenget ist / das  
ist wider Gott/Natur/vnd alle Billigkeit. So heissen  
Zeugen nicht ein grosser hauffen vieler Meuler / die  
vber einen vbel ausruffen / Also were Christus/Pro-  
pheten/vnd Apostel zu Nicht vnd Recht verdammet/  
Weil grosse Könige/gantze Lande vnd grösste Stedte  
vber sie eintrechtig geschrien / sie dafür gehalten vnd  
geurteilet/das sie Auführer gewesen/vnter dem Na-  
men dieselbigen erwürget haben / Zeugen/sage ich/  
heissen nicht Kleffer / Sondern die Personen / die in  
Ordentlichem Gericht/ da die Sache zu Rechtlicher  
verhör komen / auff Klage vnd Antwort / werden  
nach ausweisung der Rechten fürgestalt (das verste-  
hestu ja wol ) Ehe denn das geschicht/ sag ich frey  
K iij rund,



### Vom Beruff der Prediger.

rund heraus / Wolte ich kein Fürstenthumb nemen /  
vnd einen armen Diener verdammen / Denn feilet  
ich / vnd Er were für Gott vnschuldig / Wie köndte  
mir denn erger auff Erden geschehen / Denn das ich  
dem lieben Gott / der meines Todes vnd Lebens  
macht / meinen Odem in seinen Händen hat / Danie-  
lis am fünfften / seinen Elenden vnschuldigen / Ihm  
aber so lieben Diener / auff ein ledig Feldgeschrey der  
Welt / vnd damit in selbst verdammete? Were er aber  
gleich schuldig / so hette ich doch abermals Gottes  
grimmigen Zorn am Halse / das ich wider sein Ge-  
richt / vnd zuuerkleinerung desselbigen / das für Recht  
spreche / Welches nicht zu Recht ausgefüret / wie  
Gott haben wil / Quod iustum est, iuste exequere, So  
heißts Deut: xvj.

Lieber fromer Gott wie kömet man doch dar-  
zu / Das man einem armen Diener Christi / das nicht  
gönnet / so man einem öffentlichen bekandten Diebe  
thut. Wenn der gleich auff der that begriffen / Noch  
hette mans zu ehren / für der Weilosen Welt eine  
schew / Denselbigen vnuerhöret / vnbeklagt / vnd vn-  
überwiesen / zu richten. Ist keine Stad / die viel Gelt  
vnd Golt neme / vnd solches mit grund der Wahrheit  
jer ließe nachsagen / Vnd wie kömet doch der frome  
trewe Gott darzu / das er solchs von vns leiden mus /  
Welches doch kein Mensch auff Erden vertragen  
würde / das im ein frembder / seinen Diener / vrlaubet  
oder verjage / des er nicht entperen köndte / Ja / schreibet  
Lutherus / Es ist kein Hirten Bub so gering / der  
von einem frembden Herren ein krum wort lidde /  
Allein



Vom Beruf der Prediger. 37.

Allein Gottes Diener / der sol vnd mus jedermans  
Nödel sein / vnd alles von jederman leiden / Darge-  
gen man nichts von ihm / auch nicht Gottes selbest  
Wort / wil oder kan leiden. Was vns aber solches  
werde guts bringen in der lieben Kirchen vnd Schu-  
len / vnd wie darin die jenigen / so da schuldig dar-  
an sind / grewlicher handelen / denn der Papst vnd  
Türcken / Darvon liese den lieben Lutherum / Tom:  
viii. Jenen: fol. clxxxix.

Darumb sehe doch vmb Gottes willen Obri-  
keit darinnen wol zu / fare doch nicht so gar geschwin-  
de mit den armen Dienern Christi / als hette er sie im  
Dreck gefunden / vnd der Welt in die Kappus gege-  
ben / sie zu handelen nach eines jeden gefallen. Denn  
weil es heist Gott verachten / wo man die Prediger so  
verechtlich handelt / Was ist anders vnd gewissers  
zuermuten vnd zu glauben / weil Gott nicht feilet  
noch leuget / Denn das er dieselbigen Verechter seiner  
Diener / widerumb lasse veracht werden / Wie er dre-  
et / i. Samuel: ij. Vñ kome denn die effusio contemptus  
super principes terræ darzu / Psal: cvij. vnd Jesa: xxiiij.  
Dominus excercituum cogitauit hoc, vt de traheret su-  
perbiam omnis gloria, & ad ignominiam deduceret vni-  
uersos inclytos terræ &c. Solches ist vns zur Lere vnd  
Warnung fürgeschrieben / sagt Paulus zun Römern  
am funffzehenden / vnd i. Corinth: x. Sol derhalben  
ein jeder / fürnemlich aber die grossen Neubter für  
allen / Jerem: v. den lieben Gott fürchten / Für sei-  
nen Zorn hilfft keine Macht / Krafft noch Gewalt /  
Da



### Vom Beruff der Prediger.

da ist dencken an verloren / Jesaiæ am vierzehenden.  
Dominus decreuit, quis poterit infirmare? vnd Jere-  
miaæ am funfftzigsten. Wer ist mir gleich / vnd wer ist  
der Hirt / der mir widerstehen kan?

Thue jm derhalben die Obrigkeit also. Sehe  
den Predigern mit nichten zu / das sie es machen wie  
sie wollen / Bey leibe nicht / wie droben gesagt / Son-  
dern betrachte / Das jr vnd den armen Vnterthanen  
daran gelegen / was der Prediger thut vnd für hat.  
Macht ers recht in seinem Ampt / so geniessen wirs  
alle / Macht ers aber vnrecht / so gehets warlich vber  
die armen Kirchen / zu der die Obrigkeit auch gehö-  
ret. Zu dem / das kein zweiffel / weñ Prediger jr Ampt  
nicht recht ausrichten / verderben sie auch alle zeitli-  
che Wolfart / Wie Gott kierlich spricht / Die Hirten  
haben sie verführet / Jerem:1. vnd Treno:ij. Deine Pro-  
pheten haben dir lose vñ törichte Gesicht gepredigt /  
Vnd dir deine Missethat nicht geoffenbaret / damit  
sie dem Gefengnis gewehret hetten / Sondern haben  
dir gepredigt lose predigt / damit sie dich zum Land  
hinaus predigten etc. Ist derhalben der Obrigkeit /  
auch zeitlicher regierung halben / daran gelegen / wie  
dis Ampt werde ausgerichtet.

Es mus aber Obrigkeit recht zusehen / Nicht  
wie Vernunfft leret / Oder der art / wie sie sonst in jren  
Weltlichen Sachen alle ding verrichten / nach gemei-  
nem verstand der Rechten / Von denselbigen wil sich  
der liebe Gott / vnd sein Ampt (darinnen er sein Regi-  
ment



Vom Beruf der Prediger. 38.

ment füret / Wie droben gehöret vnd bewiesen ist) nicht Regieren lassen / Leidets auch Vernunfft vnd die Natur selbst nicht / Das die Creatur vber ihren Schöpffer / Das Zeitliche vber das Ewige / Der Knecht vnd Vnterthan ( wie Obrigkeit mit Vernunfft vnd allem Rechten für Gott ist / Rom:xiij.) vber den Herrn richten/vnd den Regieren solte/ Kündte auch/wo es gleich vnbesonnen der vnart fürgenommen würde / Die Kirche/ noch einiges Gottseliges Gewissen nicht annemen noch folgen / Weil die Regiment vnterscheiden/vnd wir darauff klaren ausdrückten Befehl haben / Der Obrigkeit nicht zu geben/was Gottes ist / Matthei am xxiij. Actorum am iij.vndv.

SO wolt es sich auch mit den Exempeln der Löblichen fromen Könige nicht schicken / Welche nicht Reformiret / vnd in der Kirchen auff die Prediger gesehen/nach irem Gutdüncken / Ja/die solches gethan/haben einen schendlichen bösen Namen darvon/Vnangesehen was treflichen Scheines sie den Sachen gemacht/ das sie es bösllich vnd vbel ausgerichtet/Als / Jeroboam/Ahab/vnd ihres gleichen/ denen Gott solches noch heut zu tag auffrücket vnter der Erden/nach etlich tausent Jaren/ vnd inen in die Gruben das nach ruffet/ Das sie damit geirret/ vnd andere Leut irren gemacht etc.

Manchen darumb die fromen König diesen weg darzu / Wie denn Gott der Obrigkeit darzu sein  
L Wort



### Vom Beruf der Prediger.

Wort vleissig zu lesen befohlen / Deutero: am sieben zehenden / Vnd suchen erstlich die Bibel zur Hand / Aus derselbigen sehen sie darauff / Was ein jeder Prediger recht nach Gottes willen ausrichtet / oder nicht ausgerichtet / Wie du siehest vom Josaphat. ij. Para: xvij. Jehiskia ij. Para: xxix. Josia. iij. Reg: xxij. Die sagen nicht / Ihr Pfaffen / Dis vnd jenes gefelt vns nicht / düncket vns nicht recht sein / dienet zu vnfried / Also reden die Gottlosen Fürsten vnd Kethe / Jeremia am acht vnd dreissigsten. Das Gesetz Buch giebet Josaphat den verordeneten Visitatoribus / nach dem selbigen zu leren vnd zu handelen. Meine Söne sagt Jehiskia zu den Leviten / Seid ja nicht hinlessig / Befielet jnen zu thun / nach des Königes Gebot aus dem Wort des HErrn etc.

Also thue frome Obrigkeit auch / Neme nicht den Justinianum vnd Bartholum / sondern die Bibel für sich / Vnd dencke nach derselbigen allezeit / das Prediger nicht ire / sondern Gottes Diener / Nicht auff jren willen / sondern auff Gottes Wort / dasselbige zu leren / vnd nach demselbigen alle Sachen in jhrem Ampt zuerrichten / bestellet sind. Weil sie denn verniemet / das die Prediger solehs dergestalt handelen / So dencke die Obrigkeit / das sie Gott nicht allein kan leiden / Sondern für seine Diener wil geehret vnd gefördert haben / Darumb sol sie Obrigkeit für allen / auch ehren vnd fördern / vermög jres Ampts / Das Gott zu ehre dem / der da recht thut / hat eingesetzt / zun Römern am dreyzehenden. Vnd ob denn auch die Prediger gleich in solcher verrichtung etwas



Vom Beruf der Prediger. 39.

was bisweilen zuviel / oder zu wenig theten / Weil aber nur die Lere vnd das Leben rechtschaffen ist / so hab man mit den armen Leuten gedult / Weil sie Gott der Oberste Richter vnd Herr dieses Ampts / darinnen wil entschuldiget haben / Wie Paulus spricht / ij. zum Corinthern am fünfften. Thun wir zuviel / so thun wirs Gotte / Sind wir messig / so sind wir euch messig. Vnd weil es Gotte zu dienst geschicht / wo wir etwa zu scharff mit den Leuten handelen / Wie es Lutherus daselbst am rande ausleget / wie wolt man es denn verdammen / vnd darumb einen Prediger verstoßen? Vnd was mus man gar oft den Eltern im Hausregiment / vnd der Obrigkeit in Weltlicher Regierung / für grobe / dicke / Grumpen zu gut halten / Das doch weder Gott zu ehren / noch einigem Menschen zu gute gereicht? Wie kömet es denn / das man eben an den armen Predigern allein / so gar nichts kan vertragen? Ich sage wo die Lere vnd das Leben recht schaffen ist / Denn wo es da feilet / ist alle gedult aus / Gal. j.

Da man sich aber ja bedüncken liesse / die Feil weren also geschaffen / das sie vnleidlich / So ist abermals ein guter Richtiger weg darzu / So fern sag ich widerumb / Das Lere vnd Leben rechtschaffen ist / Nemlich das Obrigkeit sich der Sachen auch bey Benachbarten Kirchen erkündiget / ihr Bedencken denselbigen fürtreget / höret darauff auch ander Leute Judicia / Wie solchs sein in Concilio Antiocheno Cap xiiij. verordenet / Vnd des ein schön Exemplum ist / apud Ambrosium Epist. lxxix. Also kan man den /

L ij (wo



### Vom Beruff der Prediger.

(Wo man nicht was anders ſüchet) one der Kirchen ſchaden/betrübung oder zerrüttung/ Was ſolche feil ſind / feuberlichen vnd ſchon beylegen / Vnd wo der mangel an den Predigern were/dieſelbigen ires vnſuges berichten / Das ſie ſich darnach muſſen weiſen laſſen/Was wil man mehr?

Vnd was iſt auch die Sache für Gott gebefert/wenn man dieſen Weg in ſolchen Wendelen / da ſonſt Lehr vnd Leben rein ſind/nicht fürnemmet/Was haben wir dauon? Freilich anders nichts/wie für ſuzgen/Deñ Vnfried vnd Vnrath/ ſampt einem ſchendlichen böſen gewiſſen/ Das wir denſelbigen ſelbſt geſtifftet vnd angerichtet/Gott zu verdries/ vnd der Kirchen zu leid/Mügen darumb ſchreiben vnd ſchreien/ Alle ſachen putzen / wie wir immermehr können / Wenn gleich damit alles erhalten / die Prediger habens verſehen/vnd ja zu viel gethan/Vnd were alles beſſer gelaffen/etc. Dennoch entſchuldiget ſie Gott/wie droben gehöret / vnd kan ſie darumb im Ampte leiden/Wer heiſt denn vns/vnd worauff ſind wir entſchuldigt/das wir ſie aus ſeinem Dienſt ſtoſſen/vber welchen wir ſo viel macht vnd Rechts haben / als der Teufel am Himelreich? Darzu wird darüber vnſerm Herrn Gott ſein liebſte Kirche /ohne Not/mit freuel/jemmerlichen betrübt / zerrüttet vnd zerriffen/ Da man in andere wege den ſachen hette können rathen. Wer antwortet nun dem lieben Gott für ſolchen ſchendlichen Auffrur? Zum dritten wollen wir denn auch nicht leiden/ Das ſolche Not vnd jammer  
jemandes



Vom Veruff der Prediger. 40.

Jemandes beklag oder besenfftze / Das ist / Alle Welt  
sollen vns zu willen vnd gefallen rhulofs sein / Nach  
Gott nicht fragen / Der die Prediger als tewre Ga-  
ben wil geehret haben / vnd zwifacher ehren werd ge-  
halten / Wie die Kartenmenlin sol man Prediger ach-  
ten / Da man eines zerreist / ein anders bald an die  
stad leget / so ist das Spiel wider vol. Was sind aber  
das für Leut / die da brechen vnd zerstrawen / Da der  
HERR Christus samlet vnd bawet / Lucae am Fiff-  
ten. Vnd worfür werffen wir vns damit selbst auff /  
wenn wir vber Gott vnd seine Kirche / Niemandes kei-  
nes besseren verstands / Gericht vnd Vrteil aus Got-  
tes wort gestatten / Daraus doch ein Christ alles zu  
Nichten macht hat: i. Corinth. ij. Was kan der Teufel  
oder Bapsts Ergers thun?

Wenn es aber die Lere belangete / das man sich  
liesse bedüncken / Ein Prediger verfelschete Gottes  
Wort / verführete die Leute in Irthumb / zu Aufferbur /  
Aberglauben / handelte nicht recht mit der Absolu-  
tion / Gewalt der Schlüssel / Austeilung der Hoch-  
würdigen Sacrament / vnd dergleichen / Da sol  
Obrigkeit sonderlich wachen vnd zusehen / Nicht  
lang seumen / Sondern betrachten / das solche Giff-  
t plötzlich vmb sich frisset / Wie der Krebs oder kalte  
Fexer / ij. Timoth. ij. Das darff nicht langer zeit / son-  
dern setzet vnd wurtzelt bald / Das man im darnach  
mit brennen vnd schneiden / schwerlich in langer zeit  
helffen kan / Darumb heist es alhie recht.



## Vom Beruff der Prediger.

Principijs obsta, sero medicina paratur,  
Cum mala per longas conualuere moras:

Es nem es aber Obrigkeit abermals / nicht mit lauter gewalt one Recht für / Denn also weist du wol / kans Gott nicht leiden / der das Recht wil mit Recht ausgefüret haben / So kans die Kirche nicht auffnehmen / Wie droben gehöret / Deut: xvj. vnd ij. Timoth. v. feret aber die Obrigkeit hierüber ohne Recht / mit Gewalt / wie ist sie denn entschuldiget / das sie recht handele / als für Gott / Wenn gleich ire Sache noch so gut were?

Darumb / auff das die Kirche wisse / wem recht oder vnrecht geschehen / vnd die Obrigkeit entschuldiget sey / das sie das gethan / so Gott fordert vnd im gefellig ist / So thu sie im also / Neme solche Prediger für / die der Lere halben / vnd verhandlung der Sachen / so in jr Ampt / darumb sie zu der Kirchen Seligkeit gehören / verdecktig sind / Verhöre sie darauff in beysein Gelerter vnd verstendiger leute / so Christlicher Keiner Lere grund haben. Findet sichs denn / das sie wider Gottes Wort geleret vnd gehandelt / so folge man dem Rath Christi / vnd seinem Befehl / fliehe / meide / gehe deren müßig / Weil er sie nun selbst nicht leiden kan / sie auch damit sich jres Ampts würcklich selbst entsatzen haben / Darumb sie auch ihnen selbst mögen die schuld geben / vnd nicht der Obrigkeit.

Solchen Process wil Christus haben / wie er  
den



denselbigen auch gebraucht vnd wircklich eingese-  
tzt. Denn da er vermeinet / das die Juden vber seine  
Lere klagen / fragt er nicht / Lieben Herren / was sagt  
ir darzu. Was ist ewer Meinung? Das wust er vor-  
hin wol / So sagten sie es im auch frey vnter Augen /  
Er were ein Samariter / Das ist / ein Ketzer vnd  
Schwermer / Aber sagt Christus / Wenn es keinen  
anderen grund hat / so heist das Gott in seinem Ampt  
lesteren / der es sucht / vnd one zweiffel richten wird /  
Johannis am achten. Dis ist aber die rechte verhan-  
delung / Welcher vnter euch kan mich einer Sünde  
zeigen. Das ist gut Deutsch gefraget / vnd dem jeni-  
gen / so der Lere halben klagt / aufferlegt / seine Klage  
zu beweisen / Nicht aus dem / was vielen Leuten ge-  
felt / Dieselbigen für rechte Lere halten oder nicht hal-  
ten. Ach **WELCH** Gott / Also wolten wir die Rechte  
Keine Lere / vnd art zu predigen bald verlieren / Weil  
die rechte Predigt / der Welt eitel thorheit / i. Corinth.  
i. Ja / heffige Strick vnd bande sind / Psal. ij. vnd Jer.  
ij. vnd v. Contra sagt Paulus / Eben derhalben bin ich  
gewisse / das ich Christi rechter Diener bin / weil ich  
der Welt gar nicht gefalle / Gal. j. Wie wir auch auff  
sie nicht bestellet / kein Ampt von ir empfangen ha-  
ben.

Sünde heist im Predigampt / Wenn man anderst  
leret vnd handelt / denn Gott in seinem wort befohlen  
hat vnd eingesetzt / Wie Sünde in gemein alle das  
Jenige ist / Nicht daran die Welt gefallen oder  
vngefallen hat / Sondern was **G D T T L S**  
Wort



### Vom Veruff der Prediger.

Wort zu wider / oder entgegen ist / Wie Paulus nicht iudicium mundi, Sondern legem DEI zu einer Regel macht / Des was Sünde / oder nicht Sünde ist / Roma. iij. iij. vnd vij. Darumb sol derjenige / der vber falsche Lere klagt / seine Klage beweisen / aus Gottes Wort. Da tret herfür lieben Jüdelein / saget Christus / vberweist mich des / aus Gottes Wort / das meine Lere Sünde vnd vnrecht sey / Das wil Ich hören / Wie er auch zu dem sagt / der im einen Backenschlag gab / Dabe ich vnrecht geredt / so beweis es / das vnrecht sey / Dabe ich aber recht geredt / warumb schlechstu mich? Joan xvij.

Sihe das heist recht handelen / vnd nicht mit lauter Gewalt bösslich faren / wie Tyrannen vnd Verfolger der reinen Lere ( Ich sage reiner Lere ) pflegen zu thun / vnd ist hiemit Obrigkeit vnd die Kirche verwaret / Darumb vnd aus dem grunde. Denn also lest man dem lieben Gott das Vrteil selbst / vber sein Ampt vnd Ministerium / in seinem Wort / Vnd was er in dem wort weist / dem kömet man demütig / Christlich vnd schön nach / Also bleibet man bey dem wort / Ob man gleich die Person aus dem Ampt setzet / Weil sie Gott / als der einige DERR des Ampts / darumb selbst entsetzet / Das sie das Ampt hat faren lassen / vnd nicht nach seinem willen ausgerichtet / Dsee am vierden. Da man sonst / wo man one diesen Proces feret / mit der Person / das Wort / Ampt vnd Gott selbst verachtet vnd verstößt / i. Samuelis am achten. Non te, sed me abiecerunt &c.

Also



Also thu man jm auch / wo die Prediger eines  
 ergerlichen / schendlichen / bösen lebens sind / wenn  
 dieselbigen fürgenommen / aber keine vermanung zu  
 der besserung an jnen hilfft / weil sie Gottes Namen  
 damit lestern / wie Augustinus saget: Qui male viuunt,  
 & si prædicant lingua, blasphemant tamen vita, Darzu  
 hiermit grewliche ergernis anrichten / wider Gottes  
 wort / welches da wil / sie sollen in jrem leben vnd  
 wandel ein fürbilde sein der Werde / i. Timoth: iij. vnd  
 Ti. ij. vnd i. Pet. v. vrsach geben / das vmb jrent willen  
 auch Gottes vnschuldiger Namen von anderen gele-  
 stert / Rom. ij. Die arme Kirche also nicht gebessert /  
 sondern geergert vnd verderbet wird / Solche leide  
 die Kirche vnd Obrigkeit nicht / Wie denn die Kirche  
 noch Obrigkeit keine lesterung noch offentlich erger-  
 nis leiden sol / Sondern denselbigen wehren / vnd die  
 von sich thun / i. Cor. v. Rom. xij.

Vnd wolte Gott von Himmel / Obrigkeit were  
 darinnen vleissiger / vnd neme sich der sachen ernstli-  
 cher an / straffte dermassen / nach beschehener verhö-  
 r vnd beweisung / Nicht die jenigen / die da Sünd vnd  
 ergernis in lere vnd leben mit Gottes Wort straffen  
 vnd widerlegen / das ist jr Ampt / jr trew / ihr pflicht /  
 Darumb wer sie darinnen hindert / betrübet vnd auff-  
 helt / der hindert vnd betrübet Gott vnd sein wort /  
 darinnen ers befohlen vnd eingesetzt hat / Solte dar-  
 umb Obrigkeit die straffen / die solch ergernis an-  
 richten in lere vnd leben / Das es aber gemeiniglich  
 wird vmbgewendet / ist leider für augen / vnd wol zu  
 erachten / das es eine gewisse anzeigung ist / das wir

W

der



### Vom Beruff der Prediger.

Der reinen lere von hertzen feind / vnd müde / satt vnd  
vberdrüssig sind / was fragen wir darnach / was  
nach Gottes willen recht oder vnrecht / wenn es ge-  
het wie wir wollen etc.

Gleuben wir aber / das ein Gott sey / der die  
schmach vnd schande / so im widerfaren in den Die-  
nern seines Ampts / welches er mit seinem schweis  
vnd Blut erworben hat / Luth: Co: v. Jenen. Deutsch  
fol: clxxxiiij. an jenem tage richten vnd rechen / Mat-  
thei am fünff vnd zwanzigsten. Ja auch zeitlich auff  
Erden straffen werde / nicht allein an den Personen /  
sondern auch an dem ort / der vns gehauset vnd ge-  
herberget hat / Matthei am zwey vnd zwanzigsten.  
Wie wir gleuben müssen / wo wir nicht Gottes wort  
leugenen / vnd damit klar / vnd offentlich vnsern vn-  
glauben bezeugen wollen / Wolan so last vns auffhö-  
ren / vnd wer vnrecht hierinnen gehandelet / Busse  
thun von hertzen / vnd sich darvon keinen Deucheler  
noch Fuchschwentzer damit abhalten / das er fürgie-  
bet / Lutherus wolle / man sol die jenigen / so zuuor of-  
fentlicher falscher Lere bekant vnd vberwiesen sind /  
Das sie wider einen Artickel des Glaubens leren / kei-  
ne fernere Disputation / verhör noch erweisung jrer  
fürgenomen Ketzerey gestatten / Darumb woll er  
auch / das zu verhör der sachen / kein Proceß von nö-  
ten sey / Dis ist so greifflich / grob vnd vnuerschampt  
auff den heiligen Mann gedichtet / vnd gelogen / das  
es ein jeder greiffen kan / Denn eben am selbigen ort /  
Lutherus der Obrigkeit zum Exempel anzeucht / das  
Constantinus (eben der grosse Keiser) den gewolichen  
Unge



Vom Veruff der Prediger. 67.

Vngeheuren Ketzer Arium / durch den Landflegel  
Probum / gegen den Athanasium hat lassen verhö-  
ren / Tom. v. Jenen. fol. lxxv. So magstu danon wider  
solche Lügener ferner lesen / in der Jenischen Hans-  
postill / fol. cj. Item / Tom. iij. Jenen. Deutsch. fol.  
cccxxv. Wie vngedültig / vnd wofür er solche Sün-  
de halte / Wo ein Prediger für keinem Richter beklag-  
get noch vberwiesen / Obrigkeit selbst in einerley Sa-  
che Part vnd Richter sind / auch nachmals andere  
auffstellen etc. Tom. v. Jenen. Deutsch / fol. ccclviij.  
Wie ich dieselbigen Epistolam hernach darumb hier  
zu verzeichnen lassen / so wol als die andere. Tom. v. Je-  
nen. Deutsch / fol. clxxxviij deren ich droben etliche  
mal auch gedacht / Ob jemand aus armut die To-  
mos nicht hette / das er doch Lutheri Iudicium aus  
Gottes Wort lesen köndte.

Ich wil hiermit den jenigen / so da gerne wol-  
ten recht thuen / Oder wo sie geirret / sich weisen las-  
sen / Freundlich gedienet / Der anderen aber / so Got-  
tes vnd seines Worts vngeachtet / dennoch friesch  
vnd frölich hindurch faren / ires Bluts mich vnschül-  
dig gemacht haben für Gottes Gerichte / Ob dassel-  
bige heut oder morgen vber Deutschland würde anz-  
brennen / wie eine verzerende Brunst vnd Fewr / (wie  
ohne zweiffel geschehen wird / ij. Para. xxxvj.) ich  
meine Seel zum wenigsten gerettet vnd erlöset / auch  
meine liebe Kirche vnd frome Obrigkeit / vnterrichtet  
vnd gewarnet habe / Vnd hab ich meinen Danck dar-  
mit schon hinweg / vnd mich des Vndancks  
nicht zu bekümmern / **CHRISTVS** lebet

M ij

vnd



Vom Beruff der Prediger.  
vnd regieret auch mitten vnter seinen Feinden / dem  
ich diene mit trewen / der wird auch mein frö-  
licher lohn sein an jenem tage /  
Amen. Das weis ich für-  
war / Im sey lob  
in ewigkeit /  
Amen.



## Amos 5.

SE sind dem feind / der sie öffentlich straf-  
set / vnd haben den für einen Grewel // der heilsam  
keret.

Trewe



# Treue Vermanung/

Doctor Martini Lutheri/an einen Pfar  
herr / das er zu vnbillichem absetzen eines Predi-  
gers/nicht still schweigen/noch zu eines andern an  
seine stat eindringen/willigen solle. Vnd das er sol-  
ches Ampts halben zu thun schuldig sey / ge-  
schrieben Anno 1531. Tomo 5 Tenen.

Deutsch / folio 358.

**G**nade vnd Friede im Herrn /  
Wir wissen lieber Herr vnd Freund //  
das wir schuldig sind / nach dem Ge-  
setze der Liebe/das einer für den andern sol sorgen/  
(wie ein glied am Leibe für das ander) vnd in fahr  
vnd schaden warnen / dem Gesetz nach / sorge ich  
auch für euch/vnd werde dadurch verursacht/ diese  
kurze vermanung vnd warnung an euch zu schrei-  
ben/auff das jr durch mein stillschweigen nicht der  
mal eins in fahr komet / daran ich hernach auch  
müste schuld vnd teil haben. Nota.

Ir wisset / das jr der Kirchen zu R  
rechter beruffener/ beide vom Rath vnd der Gemei-  
ne angenommen/Pfarherr vnd Seelsorger seid/ Al-  
so//  
M iij



Trewe Bermanung D. M. Luthers:

Nota.

so/das jr an jenem tag rechenschafft müst geben für dieselbe euch befohlene Kirche / vnd schuldig seid/so lang jr lebet/so mit reiner Vere zuversorgen/ für sie mit ernst zu beten/sorgen/wachen/ vnd ewer Leben in allerley not vnd fahr / so fürfallen mügen / als Pestilentz vnd andere franckheiten/wie sie nu heissen / zu wagen vnd lassen / vnd vorn an der spizen zu stehen/wider die Pforten der Hellen / vnd alles was ein fromen trewen Pastor vnd Seelsorger/ampts halben gebüret zu thun / leiden vnd ausstehen/Welchs furwar alles schwere/grosse/ia Göttliche werck sind /Wie jr denn bisher/Gott lob/pleisig vnd treulich gethan habt.

Nota.

Weil aber ist ewer rath vom bösen Geist getrieben/ den Prediger zu S. N. verstößet/ für keinem Richter weder verklagt noch oberweist einiger vnthat / Sondern solches aus eigener gewalt vnd freuel / als rasende Leute vnd rechte Kirchenreuber (nicht leiblicher Güter / sondern des Ampts vnd Ehre des heiligen Geistes) fürnehmen/ vnd in einerley Sache / zu gleich part vnd Richter sind/wil sichs in keinem weg leiden / das ihr darzu solt stille Schweigen/ oder drein bewilligen/ auff das ihr euch dieses frembden Kirchenraubs nicht theilhaftig macht/nach schuldig werdet der vnbilligen vnd



vnd schmechelichen gewalt / an dem verstorren bruder begangen, wer er aber strefflich gewest / vnd het te verschuld / das vrsach were gewest in vom Ampt abzusetzen / solt solches mit recht / auch mit ewerem wissen vnd rath / als des Pfarherris surgenommen sein.

Noch erger aber istis / das sie einen andern an des verstorrenen stat / auffstellen / on ewer erlaub / ja wider ewren willen / vnd also aus gleicher eigener gewalt vnd vnrecht / nu auch an euch geübt / denselben eindringen. Sie lieber Herr vnd freund / seid gewarnet / omb Christus willen / das jr euch wol fürsehet (denn es furwar nicht ein schlecht geringe sache ist) das jr euch mit den Kirchenreubern nicht verschuldet / vnd ein theil des Fluchs nicht auch ober euch gehe.

Nota

Fragt jr nu / was euch hierin zu thun sey? Ich zwar weis nicht viel zu raten / doch sehe ich fur gut an / ermane euch auch treulich / das jr bey der sache thut / wie ich ihm thun wolte / Erstlich solt jr den vnberuffen vnd eingedrungen Prediger / fur euch in gegenwart der andern ewer gehülffen / fordern / vnd ihm gütlich / doch mit einem ernst fürhalten / des Rathis freuel / vnd durst / vnd weiter ihm anzeigen / das er durch euch (dem die Kirche befohlen) nicht beruffen sey / derhalb als ein Dieb

Nota

vnd



Trewe Vermanung D. M. Luthers:

Nota

Und Mörder kome / vnd gleichwol in derselben ewren Kirchen lere vnd regiere / für welche ihr müstet Rechenschaft geben / Solle derhalb wissen / das er sich mit gewalt eindringe / vnd raube ewer Pfar<sup>ampt</sup> / on ewer wissen vnd bewilligung. Derhalb ben jr in vermanet / das er von solchem Raub abstehe / oder sol zusehen / mit was gewissen er solchem geraubten Ampt könne fürstehen / denn euch die Kirche vertrauet vnd befohlen / Derhalb on ewren willen niemand gebüren wil / darin weder lere noch Regier Ampt zu oben.

Keret er sich nu an diese vermanung nicht / so sonderlich in beysein weniger Personen mit im für genommen ist / So zeiget im an / ihr wollet eben solches / so jr im insonderheit fürgehaltē / auch ein Erbar<sup>n</sup> Rath anzeigen / das thut auff diese weise. Fordert sie entweder zu euch / oder gehet zu inen / Auff<sup>s</sup> erste fragt sie / ob sie Euch für iren Pastor vnd der Kirchen zu N. Seelsorger erkennen? Sagen sie / ja / So haltinen mit ernstlichen worten für / das ampt vnd fahr eines trewen Pastors / vnd wie ihr müst rechenschaft geben für dieselbe ewre Kirche / vnd was es für mühe / sorg vnd arbeit koste / das ganze leben ober / für sie sorgen / vnd stehen in aller Not zur Pestilenz zeit / oder ander frantckheiten die fürfallen können / wie droben zum teil angezogen. Weil  
ihre



Ihr aber mit solcher sauer schwerer arbeit ewers  
ampts keins besseren Lohns solt gewertig sein / den  
das sie euch einen Prediger (von dem ihr nicht wiss-  
set / wie es eine gelegenheit vmb in habe / seiner Vere  
vnd lebens halben) euch ungefragt / ja wider ewren  
willen eindringen / Den vorigen aber hinder euch /  
one einig erkentnis des Rechtens schmehlich vnd  
bösslich verstoffen / So wolt jr für inen bezeugt ha-  
ben / das ihr in diesen iren Durst vnd freuel nie be-  
williget habet / noch jzt drein bewilliget / vnd nim-  
mermehr drein bewilligen wolt.

Nota.

Solt sie auch darneben ermanen / das sie wol  
mögen zusehen / wen sie hören / weil er nicht be-  
ruffen / sondern mit gewalt eingedrungen wird /  
vnd derhalb / als ein Dieb kome vnd Reuber Gött-  
lichs Ampts. Bezeuget auch / jr woltet entschuldi-  
get vnd rein sein vom Blut / der / die solche gewalt  
vnd beraubung ewers Ampts fürnemen / drein be-  
willigen vnd bestettigen / Das jr solches thun solt /  
fordert die Not / damit ihr euch nicht theilhaftig  
macht frembder Sünde. Bewegt sie solche Ver-  
manung / zwischen euch vnd inen allein nicht / So  
zeigt inen an / ihr wollet solches auch dem Volck of-  
fentlich von der Kanzel vnangezeigt nicht lassen /  
Wie jr auch thun solt / mit diesen oder dergleichen  
worten.

Nota.

Nota.

N

Lieben



Trewe Vermarnung D. M. Luthers.

Lieben Leut ihr wisset/ das ich Ewer Pfarherr  
bin/ vnd mus fur Euch rechenschafft geben/ vnd al-  
le tag mein Leib vnd Leben fur Euch wagen/ wider  
Teuffel vnd alle gefahr der Seelen / Darumch ich  
auch sol vnd mus die Predigt versorgen in dieser  
Stad. Nu habt ihr einen Prediger verjaget / ehe  
er fur Gerichte vberwunden / vnd one mein zu-  
thun/ der ich doch solte fürnembst dazu thun / vnd  
vber das/ einen andern in mein Ampt/ one meinen  
willen eingesezet/ Damit mir mein Pfaramt ge-  
nomen. Nu weil ich aber Pfarher bin vñ sein mus/  
wil ich nicht dauon fliehen/ noch sie vbergeben / bis  
ich mit Recht dauon gesezt werde/ Kan auch in des  
nicht dauon fliehen / oder sie vbergeben / Sondern  
das wil ich thun/ wie Christus lert/ Wenn der Man-  
tel genomen wird/ sol ich den Rock darzu lassen fa-  
ren / vnd sollen allen Raub vnd gewalt leiden/ Al-  
so wil ich ist auch thun/ Vñ beding hiemit/ das die  
se Pfar mein sey/ vnd mir befohlen ist/ das Predig-  
amt zu versorgen vnd bestellen / Wil solch Ampt  
auch nicht lassen noch vbergeben/ Aber weil er mir  
mit gewalt genommen vnd abgedrungen wird/ wil  
ichs leiden/ vnd mir lassen geraubt vnd genommen  
sein/ vnd also ein zeitlang weichen von hinnen/ bis  
mirs Gott wider einreumet. Wil in des zusehen/  
wer so thürstig sein wil/ der sich in meine genomene  
Pfar

Nota.

Nota.



Pfar setzen darff / vnd mit was gewissen er sein  
Ampt besizen möge.

Wenn ihr sie auff diese weise gesegenet habt / so  
weichet ein zeitlang / entweder hieher zu vns / oder  
anderswo hin. Denn die argen Leut wollen dar-  
zu noch rhümen / vnd lesteren vns fur dem Landfür-  
sten / als wolten wir in ihr Weltlich Oberkeit greif-  
fen / schelten vns damit Auffrührer / vnd auff's al-  
ler höchst / so jemand zu schelten ist / da sie doch wis-  
sen / das sie daran vnrecht thun vnd liegen / Sie  
sind *Sacrilegi*, nicht wie die / so man auff's Radt  
stößet / vmb gestolen Kirchengut / welches wir lei-  
den köndten / sie auch derhalb wol vngestraftet las-  
sen / Sondern solche *Sacrilegi* sind sie / die dem heili-  
gen Geist sein Ampt vnd Ehre rauben / vnd sich  
selbst zum heiligen Geist machen / weil sie ires gefal-  
lens / Prediger ab vnd einsetzen / selbest Pfarherr  
wollen sein / vnd das Predigampt bestellen / So  
lernen sie das Euangelium.

Nota.

Nota.

Ich habe euch trewlich meinen Rath mitgetei-  
let / Gott gebe ein starcken mut / solchem nach zufo-  
men / so würde es / ob Gott wil / one frucht nicht ab-  
gehen / Denn ich hierin nichts mit vnflug oder ge-  
walt fürneme / Sondern rathe alles in der güte /  
mit Demut (doch auch mit rechtem ernst) vnd aus  
Not gewissens / anzufahen / vnd zu thun.

N z

Wenn



Trewe Vermanung D. M. Luthers.

Nota.

Wenn jr also ewren abscheid genomen / möchte  
N. auch protestiren / so es ihm gefiele / das er meuch-  
lings entwendeter vnd geraubter Kirchen / darin or-  
dentlich beruffene personen mit gewalt des Predigt  
ampts entsetzet weren / nicht predigen wolle / Auff  
das er nicht auch mit frembden Kirchenraube vnd  
Sünden beschweret würde. Dis köndt vielleicht  
ein weg sein / den Bann vnd Interdict wider an zu  
richten / denn so sich jemand an ewere stette würde  
eindringen / so wil ich sein gewissen mit meinem  
schreiben so schrecken / das ich hoffe / er sol nicht  
leichtlich da bleiben.

Nota.

Sie haben mir ein schrift gethan / vnd N. N.  
auch eine / Aber des Raths brieff habe ich nur das  
vierdte teil gelesen / vnd N. N. noch nicht gebrochen /  
Wil auch mein lebenlang keine Schrift von inen  
empfaben / vnd sie weder lesen noch hören / ich wolt  
nicht hundert gülden für den Brieff nemen / Denn  
nu weis ich doch / wofür ich sie halten sol / vnd ist  
meiner fahr vnd sorge / das heubt abe / das ich mich  
an ihnen nicht kan versündigen / der HERR  
sey mit euch / Grüisset N. freundlich /

Datum 17. Aprilis. ANNO

M. D. XXXI.



Ernste



# Ernste Schrift D.

Martini Lutheri/das ein Seelsorger/ so  
 Gottes Wort rein leret/ vnd ein Erbar vnstrefflich  
 leben führet/ Darumb seines Ampts nicht sol  
 entsetzet werden / wenn etliche Gewaltige  
 einen gram auff ihn werffen / das er  
 öffentlich Laster ( doch in Gemein)  
 wie er von Ampts wegen schül-  
 dig/hart straffet/ Anno M.  
 D. XLiii. To. 8. Zenen.  
 Deutsch/fol. 188.

**G**nade vnd Friede im Herrn /  
 Gestrenger/ Weisen lieben Herrn/ gu-  
 ten Freunde/ Ich habe on langest/ an  
 Euch Heubtman geschrieben vnd ge-  
 beten / Das jr ewren Pfarherr wol-  
 tet in der güte von euch kommen lassen / Denn ich  
 die Sachen nicht anders vernomen/ als hett er sich  
 vergriffen / vnd von den Visitoribus abgesezt  
 were. Nu werde ich von den Visitoribus berich-  
 tet/ das er sich nicht vergriffen/ sie in auch nicht ent-  
 sezt/ noch entsetzet haben wollen/ Sondern im zeug-  
 nis

Nota

N 5



Ernste Schrifft D. W. Luthers

nis geben / das er reiner Vere vnd vnstrefflichs Lebens sey / Allein soltet jr ein gram auff ihn geworffen haben / Darumb ihr furhettet ihn weg zu dringen. Daraus ich mercke / das hie der Teufel gerne wolte vnglück anrichten / vnd euch in grossen schaden führen / das mich bewegt diese Schrifft an Euch zu thun / vnd bitte ganz freundlich / wollet sie gütlich (wie ichs trewlich meine) zu ewerem besteu annehmen.

Nota.

Ich hoffe / ja ihr werdet so viel Christlichs verstandes haben / Das ein Psarampt vnd das Euangelium sey nicht vnser / noch einiges Menschen / ja auch keines Engels / Sondern allein Gottes vnser HERRN / der es mit seinem Blut vns erworben / geschenckt vnd gestift hat / zu vnser Seligkeit / Darumb er gar hart vrtheilet die Berechter / vnd spricht / Wer Euch verachtet / der verachtet mich / Vnd were ihm besser / er hette es nie gehört / spricht S. Peter 2. Pet. 2.

Nota,

Weil nu die zween trefflichen Menner / Herr N. vnd Herr N. Visitatores / die da müssen rechenschaft darfur geben / beide zeugen / vnd man ihnen gleuben mus / Das Ewer Psrher / das Rechte / reine GOTTES Wort leret / vnd ehrliches Lebens ist / Welches auch die Stad N. vnd Nachbarn zeugen. So sehet lieben Herren vnd Freunde /



de / Wie euch der böse Geist so listiglich vnd böss-  
lich sucht / Das ihr Euch solt vergreifen an dem  
obersten Pfarherr vnd Bischoff / **JHESV** Chri-  
sto / **GOTTES** Son / Der euch aus grosser son-  
der Gnaden / sein Wort vnd Sacrament / Das  
ist / sein Blut / Sterben vnd Leiden / durch seinen  
trewen fromen Diener / ewern Pfarherrn so rein  
vnd reichlich mittheilet / Wie kan der leidige Teufel  
nicht leiden / das ihr solt selig werden?

Nota

So habt jr auch nu das zu bedencen / Weil da  
kein ander vrsachen vnd schuld ist / denn das ihr ei-  
nen gram auff den Pfarherrn geworffen habt / on  
seinen verdienst / ja vmb seinen grossen Verdienst  
vnd trewe Predigt willen / das es nicht zu thun /  
noch müglich sein wil / vmb ewers grams vnd vn-  
rechten fürnemens willen / einem solchen wolbezeug-  
ten Pfarherr / gewalt vnd vnrecht zu thun / vnd mit  
Dreck auszuwerffen. Ich kan die Visitatoren  
nicht verdencen / Das sie solches nicht thun / noch  
mit solchem vnrecht jr gewissen / vmb's Teufels wil-  
len beschweren / vnd mit Euch (wo sie in Ewer für-  
nemen bewilligten) zum Teufel fahren solten. Se-  
het Euch für / Lieben Herren vnd Freunde / sehet  
euch für / bringet Euch der Teufel zu Fall / so wird  
ers dabey nicht lassen / Sondern weiter fellen.

Nota

Nota

Der



Ernste Schrift D. M. Luthers.

Nota.

Der erste fall ist dieser/das jr solt ewern Pfarherr verachten / vnd hassen one vrsachen / das ist/ Christum aller Pfarherrn Obersten selbst verachten/ Da werdet jr euch an den stein stossen/vnd an dem verzerenden Feuer verbrennen / denn ihm ist mehr gelegen an einem fromen trewen Pfarherr / weder an aller Oberkeit in der ganzen Welt/denn derselbigen Ampt dienet jm nicht zu seinem Himmelreich/ wie das Pfarampft thut. Mit diesem bringt ers dahin / das er ewer hertz vnd mund zustopffet/ das sie nicht glauben/nicht beten/nicht loben/noch ewer Heubt fur Gott auffheben dürfft / in keiner not/Wie er spricht Math. 5. Lass dein Opffer fur dem Altar / vnd versüne dich zuuor/ Damit weret jr schon keine Christen mehr/ hettet euch selbst verbannet/das ist schrecklich.

Nota.

Nota.

Darnach wird ers dahin arbeiten/ das er vber diese ewer Eigen sünde/ euch mit grossen frembden sünden felle/ Nemlich / das jr sollet ewren vnschuldigen Pfarherr verdringen/damit die Kirche wüst werde / vnd Kinder vnd andere fromme Leut des Worts/ Tauff vnd Sacraments beraubt blieben/ vnd so viel an euch ist / auch mit euch verdamet sein müssen/ Das wer viel erger denn des Papssts Regiment/wie wolt jr das verantworten? Dazu weiß der gemeine Man / vnd die liebe jugent solch greulich



lich Exempel sehen würde/ Das man gelerte/ from-  
me Pfarherr/ für ire mühe vnd trewen Dienst/ also  
mit dreck vnd schanden belohnet/ Wer wil ein Kind  
zur Schule ziehen? Wer wil mit seiner Kost studi-  
ren? Wo wollen wir denn Pfar herr nemen?

Nota.

In diesen schaden sucht der Teuffel / durch sol-  
che Ewer / vnd Ewers gleichen mutwillen / Euch  
vnd andere/ Wie gesagt/ Zu führen. Wie viel besser  
wers/ vnter dem leidigen Papsst vnd Türcken sein/  
Da doch noch Schulen vnd Kirchen blieben sind/  
zu Pfarherrn vnd Predigern / weder vnter Euch  
die ihrs gar wüst wolt machen.

Nota.

Zum Dritten/ Wo ihrs versehet / wird er euch  
zur lezt in verstockte vnbusfertigkeit fellen/ Da ist  
es denn aus mit Euch/ vnd kein Rath mehr/ ja hie-  
mit gehet der leidige Teuffel omb / Darumb je e-  
he je besser mit dem Pfarherr vnd Kirchen / Das  
ist/ mit G H R Z S E D vertragen/ das ihr nicht  
auch ein Exempel werdet/ wie etlichen bereit an ge-  
schehen.

Nota.

Sind doch wol andere Wege zu finden / Wer  
den Pfarherr nicht hören wil / dem stehet die Kir-  
chenthür offen / So mag er auch wol on Gottes  
D gnade



Trewe Vermanung D. M. Luthers.

Nota.

gnade heraus bleiben. Die Kirchen sind nicht dar-  
umb gebawet/noch die Pfarren gestiftet/das man  
sol hinaus stossen/die Gottes wort leren vnd hören  
wollen / vnd die drinnen lassen / die Gottes Wort  
nicht dürffen/woch hören wollen/Sondern sie sind  
gebauet vnd gestiftet/vmb derer willen/die es gern  
hören vnd nicht emperen können. Ir seid nicht Her-  
ren ober die Pfarherren vnd Predigampt/habt sie  
nicht gestiftet/Sondern allein Gottes Son/habt  
darauch nichts dazu gegeben/vñ viel weniger recht  
an / weder der Teufel am Himmelreich / solt sie nicht  
meistern noch leren/ auch nicht wehren zu straffen/  
denn es ist Gottes / vnd nicht Menschen straffen/  
der wils vngewehret/sondern geboten haben/War-  
tet Ewers Ampts/ vnd lasset G D E E sein Regi-  
ment zu frieden / ehe ers euch Lere / müssen thun.  
Ewer keiner ist / der es leiden kan / das ein Fremb-  
der ihm seinen Diener vrlaube/oder verjage/des er  
nicht emperen köndte / Ja es ist kein Hirtenbub so  
gering / der von einem Frembden Herrn ein krum  
wort lidte/Allein Gottes Diener/der sol vnd mus  
jedermans Höddel sein / vnd alles von jederman  
leiden / Dagegen man nichts von ihm / auch nicht  
Gottes selbst Wort/wil oder kan leiden.

Nota.

Solche vermanung wollet gütlich verstehen/  
die Ich trewlich meine / Denn es ist G D E E S  
vera



vermanung. Werdet ihr aber nicht hören / noch  
 Euch besseren / So müssen wir Euch lassen fahren /  
 vnd dennoch sehen / wie wir dem Teufel widerste-  
 hen / Zum wenigsten so fern / das wir vnser gewis-  
 sen mit Eweren Sünden nicht beschweren / noch  
 dem Teufel darinnen zu willen werden.

Nota.

In den Bann dürffen wir Euch nicht thun /  
 ihr thut Euch selber darein / da wir euch gerne vnd  
 viel lieber heraus hetten / Vnd wenn ihr gleich ei-  
 nen andern Pfarherr kriegen köndet / da noch fer-  
 ne hin ist / So könnet ihr doch nicht Christen wer-  
 den / noch einigs stücks Christlicher Gnade vnd  
 Lebens theilhaftig sein / So wirds auch keiner an-  
 nemen wider der Visitatoren willen / vnd Befehl /  
 Vnd wer wolt auch zu solchen verleugneten Chri-  
 sten / Die solch böß geschrey hetten / das sie ihren  
 Pfarherrn verdrängen / mit gewalt vnd vnrecht /  
 vnd gleichwol Christen heissen / vnd solchen Na-  
 men mit schanden führen wolten. Daruon würdet  
 ihr einen schönen Namen in aller Welt frigen / vnd  
 ein recht Exempel werden.

Notae

Endlich vertragt euch / Das rathe ich in Chri-  
 sto / mit ewerem Pfarherr / vnd lebet freundlich mit  
 ihm / lasset ihn straffen / leren / trösten / wie es ihm  
 von GDE befohlen ist / vnd auff seinem gewissen  
 D 2 liget /



— Trewe Vermanung D. M. Luthers.

Nota.

liget / Wie an die Ebreer am dreizehenden geschrie-  
ben stehet / Gerhorchet ewren Lerern / vnd folget  
ihnen / denn sie wachen vber ewer Seelen / Als die  
da rechenschafft dafur geben sollen / Auff das sie  
das mit Freuden / vnd nicht mit Seuffzen thun /

Nota.

Denn das ist Euch nicht gut. Den das jr fürhabt /  
ist ein böse Exempel / das ein jeglicher Amptman /  
Richter oder Ratherr wolt einen Pfarherr / des  
er kein fug / recht noch vrsachen hat / nach seinem  
Laun / freuentlich vertreiben / Gott wird vnd kan  
es auch nicht leiden.

Nota.

**G**OTT gebe das jrs nicht erfahret / Sondern  
derselbe liebe Gott helffe / Das ihr erkennet seinen  
willen / mit Furcht vnd Demut / vnd ehret seinen  
Son / das ist / sein Wort das er Euch durch sein  
Blut erthewret vnd erarnet hat / vnd seine Diener  
die armen Pfarherr / die sonst geplaget sind / vnd  
billich von Euch Weltlichen Regenten schutz vnd  
trost haben solten / damit Ewer Ampt ein **G**OT-  
tesdienst würde.

Hiemit dem lieben Gott in seine Gnade  
befohlen / Datum Sonnabend  
nach S. Pauli 15 43.





# Hiob am XIX.

Ich weis/das mein  
Erlöser lebet.

## Gedruckt zu Eisle-

ben / In der alten vnd löblichen  
Graffschafft Mansfeld/ durch  
Urban Gaubisch / won-  
hafftig auff dem  
Graben.



ANNO M. D. LXX.



XIX

Handwritten text, likely bleed-through from the reverse side of the page.

Large handwritten text, possibly a title or section header, appearing as bleed-through.

Multiple lines of handwritten text, appearing as bleed-through from the reverse side.

Small handwritten text at the bottom of the page, appearing as bleed-through.






FB: A53562

X 1387297

Fdg. 261

VD 17





1562  
1539  
1545  
1568







9

# Von dem Beruff der Prediger.

Vnd wie fern weltliche Oberkeit macht  
hat / dieselbigen ihres Ampts zuentsetzen /  
Nötiger Christlicher bericht aus  
Gottes Wort/

Joachimus Wör-  
lin D. sampt zweien Brieffen  
D. Doctoris Martini  
Lutheri. *von M. Luth. Wör-  
lin. 1572. R.*

Jesa: 66.

Siehe der HERR wird kommen mit Feuer /  
vnd seine Wagen wie ein Wetter / das er vergelte im  
grim seines zorns / vnd sein schelten in Feuerflam-  
men/etc.

Anno M. D. LXV.